

YOANE ME MIJI MENE

Mene Lui Biname Gyene

1 ¹Gawecewe te cäro camu ge aci, Mene te uja ge. Mene te Acejiyame cama ge, tabe Acejiyame ge. ²Agedna me niinäce gaabe me tabe lui Acejiyame cama ge. ³Iyeta gwidape bine Acejiyame teeme cabu ca jewenimuji; teeme cäco je nuuja gwidape te lica äbituji. ⁴Teeme cabu ireclota puga ge; pui ireclota lui apaclyera ge biname bime täápume. ⁵Pui apaclyera te krokeciiye cabu me tuungepmalenige, yepä biname lui cina krokeciiye cabu je, teepi opo lica ituge awatna pui apaclyera ne.

⁶Acejiyame te tityepuji biname ngii Yoane ne ⁷pui apaclyera ne aitnejame naace täápume iyeta biname cina teebine äteciame piyepu ätrungame. ⁸Tabe te lica ge pui apaclyera, tabe yepä jeitnäjuji teebine. ⁹Toraca apaclyera, lui te iyeta biname bine saapaclyäremuge, täduji gawecewe cabu me. ¹⁰Tabe gawecewe cabu jage, Acejiyame lui ne teeme cabu ca jewenuji, yepä biname cina teebine opo lica ewatnujisi. ¹¹Tabe teemerage gawe cabu me täduji, yepä teemerage biname cina teebine lica ecaturjisi. ¹²Yepä lui cina teebine ecaturjisi piyepu jitrungujisi, tabe teebibine conocäco ecärimuji Acejiyame me bägräwale täápume. ¹³Teepi Acejiyame me bägräwale me epu lica äbitininujisi, biname bime cabu ca lipu laplimlininusi binamerage babe me bägrä me, yepä tabe Acejiyamerage te jewenimuji teeme bägräwale me.

¹⁴Yoo, Mene te äbituji biname me, mine cama senajenäjumi. Tabe lui Babe me japurage Bägrä ge. Mine jepänujisi kokre ne, Babe te lui secäruji teebine. Tabe lui toraca piyepu owecu biname ge. ¹⁵Yoane te teebine jeitnäjuji, ala abyanuji egä, “Age sena, cane lui täápume jicepene egä: Cäme ingwe poto ca lui te pa tädepi, baborage gyene cäme bau ca, ingle cane liba camu ge aplimla, tabe piba Babe cama jage.”

¹⁶Tabe baborage owecu mime täápume, peei name pi tabe bucurage miijimiji mule bine tewenemäjumi mime täápume. Tabe iyeta padare cabu miiji niwenenanimi. ¹⁷Acejiyame te Cotre mene secäruji Moose ne, yepä Yeesu Keriso te taacanuji owecu mule ne piyepu toraca mule ne. ¹⁸Nuuja te lica ituge Acejiyame ne päpäna, yepä teeme japurage Bägrä,

lui te Acejiyame cama yepä gyene, piyepu lui te Babe gome enajenige, tabe te teebine biname bime cabu me seboclomtuji.

Yoane Niiye ca Äciseja Biname te Yeesu ne Jeitnäjige
(*Matayo 3:1-12; Mareko 1:1-8; Luuka 3:1-18*)

¹⁹Israela biname cina Yerusalema ca jityepimisi iiwäreja biname bine piyepu Leebi me ingle cabu ca biname bine Yoane bau me teebine ätemlame egä, “Maane laasi näte?” ²⁰Yoane lica ainige, yepä tabe cängengarage awabudnitige egä, “Cane Keriso lica gäne, Acejiyame te lui ne ätyepame tiicuji biname bine niiya cabu ca äsecrerrame. Cane pui lica gäne.” ²¹Teepi piba itemlisi egä, “Cije maane laasi näte? Maane nää Acejiyame me mename biname Eliya säte?” Tabe jejemige egä, “Eewe, cane Eliya lica gäne.” Teepi cuta itemlisi egä, “Nää, maane pui mename biname gäte, cine lui ne jewagrijenisi?” Tabe jejemige egä, “Eewe, cane tabe lica gäne.” ²²Teepi puma cita ca jejisi egä, “Nijini toracarage, maane laasi näte, cine piba daremu mene jewecnistenemisi, lui cina cibibine nityepinisi. Maane lipu ngene jotwananenite, egä maane laasi näte?” ²³Yoane jejemige teebibine mename biname Isaya me mene ca egä, “Cane age säne pui biname, lui te ala abayanenine daapo taatu cewe cabu ca egä, ‘Gaabe ne conocäcorage emacetnäjeje Yageyame me otni tääpume!’ ”

²⁴Pui biname cina seclige Yoane bau me, ingle Parisea sigu biname cina tityepimisi. ²⁵Yoo siige, teepi cuta teebine itemlisi egä, “Cije maane piba ngena tääpume biname bine niiye ca jääcisäjemute, maane liba Keriso lica gäte, coo liba Eliya lica gäte coo piyepu pui Acejiyame me mename biname, cine lui ne jewagrijenisi?” ²⁶Puma cita ca Yoane teebibine jejemige egä, “Cane niiye ca biname bine jicisäjenenemine, yepä weene cama pisi nyene nuuja biname, weene lui tääpume umle lica gemi. ²⁷Tabe cäme ingwe gaabe ca teeme kaakesea ne tegedninige, yepä tabe baborage gyene cäme cabu ca. Cane ibibi lica gäne teeme ernge gwidape seea bine iibirame.” ²⁸Ai mule te äpletnutige Betaniya cewe je Yoridana baduge me bimu acita gome ca, Yoane luma biname bine niiye ca jicisäjemige.

Acejiyame me Maamoi

²⁹Nuuja bimu cabu Yoane jepänige Yeesu ne otni je teeme bau me, siige tabe jiicige egä, “Ire, Acejiyame me Maamoi peese nyene, gawecewe me niiya ne lui te pa yaacatepi. ³⁰Tabe sine pui biname, cane lui tääpume tiicumene egä, ‘Cäme ingwe gaabe ca biname te pa tädepi, yepä tabe baborage gyene cäme bau ca, ingle cane liba camu ge aplimla, tabe uja Babe cama jage.’ ³¹Cane cuta niinäce umle lica ge, tabe laati tage, yepä cane puu gije labacitepene Israela biname bine niiye ca äcisejame teepi umle äbitame teeme poto cidi me.”

³²Puma cita ca Yoane Yeesu ne jeitnäjige egä, “Cane jepänine Aceji Seemo ne äina je cabucewe ca gimäe ele pana siige teeme papa cabu lenaja je. ³³Cane umle lica ge tabe, yepä Acejiyame lui te cebine nätyepipi biname bine niye ca äcisejame, tabe najepi egä, ‘Maane lui me papa cabu pa jepänepi Aceji Seemo te äina je siige teeme papa cabu lenaja je, tabe peese nyene, lui te biname bine Aceji Seemo ca pagege äciseja.’ ³⁴Cane siige ai mule ne tepänumene, siige jeitnäjine, egä tabe peese nyene Acejiyame me Bägrä.”

Yeesu me Niinäce Abiberäja Bägrä

³⁵Nuuja bimu cabu Yoane niye ca äciseja biname cääri cuta puga ge teeme neeneni abiberäja bägrä cama. ³⁶Tabe liba Yeesu ne jepänige teebibine äsuplengta je, tabe jaajige egä, “Ire, Acejiyame me Maamoi peese nyene!” ³⁷Teeme neeneni abiberäja bägrä cina liba äätecijige tabe apu iicana je, teepi Yeesu me ingwe poto ca aaclige. ³⁸Yeesu tatatrongtige, jääpänige teeme bau me otni je, äätemlige egä, “Baa, weene ngena ne jirngeniye?” Teepi jejäsi egä, “Raabi, maane luma naanajinige?” (Raabi me aboclomta mene lui ‘Abiberäja biname.’) ³⁹Tabe jaajige egä, “Siclege päpäname.” Teepi aaclige, siige jepänäsi teeme lenaja puupu ne. Ai mule te äbitige mämle bimu me, siige teepi pui bimu ne epiräsi Yeesu cama lenaja je.

⁴⁰Yoo, Yoane me mene lui neeneni biname cina äätecijige, siige Yeesu cama aaclige, teeme yepä lui Andrea tage. Andrea lui Simona Peteru me igane ge. ⁴¹Teeme otni ingwe ca ge, tabe niinäce teeme naane Simona ne jirngige, jejige egä, “Cine Mesaya ne bii jepänago. Tabe peese nyene biname, lui te biname bine niiya cabu ca cirege äsecrera.” (Mesaya me aboclomta lui yepä gyene Keriso cama.) ⁴²Siige Andrea te Simona ne Yeesu bau me ecanige. Yeesu ire acitige teeme cabu me, jejige egä, “Maane lui Simona säte, Yoane me bägrä. Cane meebine ngii naainenine Keepa ca.” (Keepa Griik mene ca lui Peteru, lui me aboclomta mene egä ‘Kula’.)

Yeesu Ala Taasoglicige Pilipo naabine Natanaela

⁴³Nuuja bimu Yeesu ngene jotwanige Galilaya probins me otnime. Puma cita ca tabe Pilipo ne jepänige, jejige egä, “Tädi cane cama otnime!” ⁴⁴Pilipo lui Betesaida ceweyame ge, Andrea naabi Simona luma cita ca ge. ⁴⁵Pilipo Natanaela ne jepänige, jejige egä, “Cine pui biname ne jepänisi, Moose lui poto cidi me ituge Cotre cabu mene iicana, piiyepu cuta Acejiyame me mename biname cina lui poto cidi me ituge oogära. Tabe lui Yeesu sine, Yoosepa me bägrä Nasareta babo cewe cabu ca.” ⁴⁶Natanaela Pilipo ne itemlige, “Nää, nuuja miiji gwidape miiji gyene pepu papa cewe ca otni Nasareta liiyepu?” Pilipo jejige egä, “Maane

tädi aima pöpäname!” 47 Yeesu liba jepänige Natanaela ne teeme bau me otni je, tabe jicige teeme poto cidi me egä, “Ai biname lui toraca Israela biname gyene. Teeme cabu nuuja walya lica gyene.” 48 Natanaela Yeesu ne itemlige egä, “Maane lipu umle gäte cane?” Yeesu jejige egä, “Cane niinäce meebine näöpänine piigi uli gawe je, Pilipo ingwe ca ala naasoglicige.” 49 Puma cita ca Natanaela teebine jejige egä, “Abiberäja biname, maane Acejiyame me Bägrä gäte! Maane Israela biname bime mope biname gäte!” 50 Yeesu Natanaela ne jejige, “Maane naace name pi cebine nätrungenite, inge cane lipu naajine, egä cane meebine näöpänine piigi uli gawe je. Ai puu matikäli mule gyene, yepä ebä pagege maane modamoda mule bine pöpänena. 51 Cane toraca jijenine weebibine, egä weene cabucewe ne pagege pöpäna iitneji, siige Acejiyame me mename seemo cina page yaaclepi cabu me cuta puma cita ca page täinetnepi biname cabu me, Acejiyame bau ca lui te täduji biname me äbituji.”

Atejäclmuta Soriyomu Kaana Cewe je

2 1 Nesae bimu ingwe gaabe ca atejäclmuta soriyomu puga ge Kaana cewe je Galilaya probins ngalebora. Yeesu me mage puga ge, 2 cuta Yeesu ne teeme abiberäja bägrä cama ituge ala asogleca. 3 Biname cina liba deedei loolo cabu jage, waina niye te piba apirige. Puma cita ca Yeesu me mage te teebine jejige egä, “Teeme waina niye lica gyene.” 4 Yeesu teeme mage ne jojige, “Magebi, maane cebine gone jaji cane ngena wawenane. Cäme padare te lica bii tatyaramtige.” 5 Yepä mage te kaakesea bägrä bine jejemige egä, “Weene jeweneye, Yeesu ngena täöpume jijenininige.”

6 Teeme Israela biname bime cotre puga ge teepi lipulipu äcisejame cude gwidape oomlana cabu ca. Ai inge name pi pui mete cabu puga ge kula ca wawenäneji siks modamoda niye ängärena gwidape; teepi iyeta ibibi ge yepä hanred liita niye täöpume. 7 Puma Yeesu kaakesea bägrä bine jejemige, “Weene ai bine niye jengäremeye!” Teepi siige jengärimisi, ngälu tapananinisi. 8 Piba tabe teebibine jejemige, “Weene niye siiteye ängära gwidape cabu ca, ecaneye deedei ire atwi biname bau me.” Siige kaakesea bägrä cina ängära gwidape cabu ca niye siitisi, ecanisi deedei ire atwi biname bau me. 9 Tabe liba mite eglige, niye te uja waina niye me bäbitige. Laatibi siitisi niye ne, teepi umle ge, egä waina niye luma cita ca gyene, yepä deedei ire atwi biname te tabe umle lica ge. Peei name pi tabe ala tesoglicige mamye rooriye ne, 10 jejige egä, “Mime mule gyene soriyomu biname bine miiji waina niye niinäce ceera, siige teepi liba bucurage yäänäjimusi, ingwe ca piba yääcäranemusi papa waina niye. Maane lipulipu miijirage waina niye ne ewetnite ceräcerägääbu ceerame?”

11 Yeesu ai teeme niinäcerage ciitaca mule ne jewenige Kaana cewe je Galilaya probins ngalebora. Apu pi tabe teeme kokre ne eboclomtige, siige teeme abiberäja bägrä cina teebine jitrungisi.

¹²Ai ingwe gaabe ca Yeesu ädige Kaprenauma cewe me teeme mage, iganewale piyepu abiberäja bägrä cama. Teepi puga icrajige nesae bimu cama.

Yeesu Ädige Iiwäreja Mete me

(Matayo 21:12-13; Mareko 11:15-17; Luuka 19:45-46)

¹³Israela biname bime äsuplengta soriyomu padare te liba mameta ge Yeesu piba ädige Yerusalema me. ¹⁴Puma tabe abacitige iiwäreja mete caale bora me, siige jepänimige biname bine kau, maamoi piyepu gimäe ele bine aletnena je iiwäreja täापume. Tabe cuta jepänimige rarekaake äbäsuwäja biname adnatäreji ge teeme dade gome. ¹⁵Puma cita ca tabe seea bine sigu jewenimige, siige teebibine teeme kau piyepu maamoi cama iyecräjemige iiwäreja mete caale bora ca. Piba tabe rarekaake äbäsuwäja biname bime rarekaake bine jeglemeläjimige gawe cabu me piyepu teeme dade bine eboclomäjimige. ¹⁶Gimäe bine lui cina aletname saawadanemusi, tabe teebibine jejemige egä, “Gimäe bine isemeye! Weene cäme Babe me mete ne gone jeweneniye aletnaletna puupu me!” ¹⁷Abiberäja bägrä cina liba jepänisi, Yeesu ngena jewenige, teepi ngene jotwinisi mene lipu oogäräneji gyene egä, “Cäme ngenecu nabenige Acejiyame me mete täापume.”

¹⁸Israela modamoda biname cina liba jepänisi Yeesu ngena jewenige, teepi itemlisi egä, “Maane ngena ciitaca mule ne jewenenite cine päpäname, egä mäame conocäco pisi nyene ai mule ne wawename?” ¹⁹Yeesu jejemige egä, “Ai iiwäreja mete ne yigarecepeye. Cane te nesae bimu cama cääri pa yaarangepene.” ²⁰Teepi teeme mene ingle ne opo lica ewatnisi, siige jejisi egä, “Ai iiwäreja mete ne lui footisiks kämäge ngalebora erangujisi. Nää, maane te nesae bimu cama pa perangepi?”

²¹Yepä Yeesu pui iiwäreja mete poto cidid me lica jiiucuji, yepä tabe teeme tääpe poto cidid me jiiucuji. ²²Ingwe gaabe ca tabe liba budre cabu ca arpinantuji, teeme abiberäja bägrä cina piba ngene jotwinujisi teeme ai mene, siige teepi jitrungujisi lui mene oogäräneji gyene, cuta teepi jitrungujisi Yeesu ngena ituge iicana.

Yeesu Umle Gyene Biname cina Lipu Gemi

²³Yeesu liba Yerusalema je puga ge äsuplengta trii padare cabu, bucurage biname cina teebine jitrungisi, teepi lipu jepänisi tabe lui ciitaca mule bine jewenimige. ²⁴Yepä Yeesu lica awabudni-tige biname bime bau me, ingle tabe umle ge, teepi iyeta lipu gemi. ²⁵Yeesu singi lica ge nuuja te teebine umle wawename, egä biname lipu gemi, ingle tabe iyeta umle ge teeme poto cidid me.

Yeesu piyepu Nikodemo

3 ¹Puga ge yepä Parisea sigu biname ngii Nikodemo. Tabe Israela biname bime yepä mutre biname ge. ²Ciiye cabu tabe Yeesu bau

me ädige, jejige egä, “Raabi, cine umle gemi, egä Acejiyame te meebine näatyepuji abiberäjame. Nuuja te äblicäco gyene apu ciitaca mule bine wawenena maane lui bine jewenenemite, liba Acejiyame lica gyene teta cama.” ³Yeesu teebine jejige egä, “Cane toraca naajenine, biname te liba kirece lica laplimluge, tabe äblicäco äbita biname me, Acejiyame lui ne yaacanuge.” ⁴Yepä Nikodemo Yeesu me mene opo lica ewatnige, siige itemlige egä, “Babo biname te lipulipu cääri laplimluge? Tabe äblicäco mage me came bora me abacita cuta cääri aplimla täöpume!” ⁵Yeesu jejige egä, “Cane toraca naajenine, biname te liba lica birige aplimla niije piiyepu Aceji Seemo cabu ca, Acejiyame te lica teebine acana. ⁶Biname me tääpe laplimluge mage cabu ca, yepä Acejiyame me Seemo te teeme seemo ne ireclota yäacäruge. ⁷Peei name pi cälü te gone näätuge, cane lipu naajine, egä weene miiji kirece aplimla. ⁸Buuwe te singi liiye yene, tabe piiyeme jääpwäjuge. Weene mumwämu itecijinuge, yepä weene umle lica gemi, luma cita ca tädenige coo liiyeme ädenige. Pepu gyene biname bime täöpume, lui cina Aceji Seemo cabu ca laplimli-ninusi.”

⁹Nikodemo Yeesu ne itemlige, “Peei lipu gyene?” ¹⁰Yeesu jejige egä, “Maane Israela biname bime abiberäja biname gäte, maane lipulipu umle lica gäte ai poto cidi me! ¹¹Cane toraca naajenine meebine, egä cine jicemus, cine lui täöpume umle, cuta jaaitnimusi cine lui bine jääpänimusi, yepä weene lica yaacatuye cime mene ne. ¹²Weene cebine lica nätrunguye, cane liba jijanininune ai gawecewe me mule poto cidi me; weene piba lipulipu cije ätrunga cebine, cane liba jijanininune cabucewe me mule poto cidi me. ¹³Nuuja te lica ituge otni cabucewe me, yepä Acejiyame bau ca lui te täduji biname me äbituji, tabe taatu ge.

¹⁴Moose te daapo taatu cewe cabu cobyame ne ewepäntuji cabu me. Lui cina pui cobyame cabu me ire acranininujisi, teepi ireclota icrajuji. Cuta pepu pana pagege baarge uli cabu awepenta teebine, Acejiyame bau ca lui te täduji biname me äbituji, ¹⁵siige iyeta lui cina teebine jäätrungusi, teepi iyeteta ireclota ne birige päpäna. ¹⁶Acejiyame te epu babo singi ge biname bime täöpume, egä tabe teeme japurage Bägrä ne tityepuji, siige laati te liba teebine jäätrunguge, tabe lica birige apesera yepä tabe iyeteta ireclota ne päpäna. ¹⁷Acejiyame te lica teeme Bägrä ne tityepuji ai gawecewe cabu me biname bine atraname niija puupu cabu me otnime, yepä tabe naace täöpume tityepuji tabe teebibine niija cabu ca äsecrera. ¹⁸Laati te teebine jäätrunguge, Acejiyame te lica pui biname ne jaatranuge. Yepä laati te lica jäätrunguge teebine, pui biname ne uja ituge atrana, ingle tabe lica ituge ätrunga acita Acejiyame me japurage Bägrä me ngii cabu me. ¹⁹Teepi atranäneji gemi, ingle apaclyera te itu täduji ai gawecewe cabu me, yepä teepi singi lica ge apaclyera täöpume; teepi krokeciye täöpume singi, ingle teeme mule lui niiyarage gemi. ²⁰Iyeta lui cina niiyaniya mule bine jaawenimusi,

teepi apaclyera ne jäägyusi. Teepi lica saacluge apaclyera cabu me, cije apaclyera te teeme mule bine jaawabudnemuge. ²¹Yepä laatibi toraca mule bine jaawenimusi, teepi apaclyera cabu me saacluge, siige apaclyera te jaawabudne-muge, egä teepi lui mule bine jaawenimusi, Acejiyame me singi ibi gemi.”

Yeesu piiyepu Yoane Niiye ca Äciseja Biname

²²Ai ingwe gaabe ca Yeesu teeme abiberäja bägrä cama ädige Yuudea probins cabu me. Tabe puga teta cama enajige matikolä padare cabu, biname bine niiye ca jicisäjemige. ²³Yoane cuta niiye ca biname bine jicisäjemige cewe ngii Aenona je lui Salima cewe mameta ge, ingle baborage niiye puga ge, siige biname cina totninisi Yoane bau me niiye ca äciseja tääpume. ²⁴Yoane ne camu ge pui padare cabu krokeciye mete cabu me äsinglenta.

²⁵Puma cita ca Yoane me abiberäja bägrä cina gije abacitinisi yepä Israela biname cama äcelame teeme Israela biname bime äciseja mule poto cidi me, teepi lipulipu cude gwidape cabu ca kälyä läbitaninusi. ²⁶Siige teepi seclige Yoane bau me, jejisi egä, “Abiberäja biname, maane cama lui biname tage Yoridana baduge nuuja poto doro ca, maane lui ne teitnäjumete, tabe cuta page biname bine niiye ca jicisäjenenemige, siige bucurage cina piiyeme otnenininisi teeme bau me.” ²⁷Yoane jejemige egä, “Nuuja biname te äblicäco pepu mule ne acata, Acejiyame te liba lica yääcärüge teebine. ²⁸Weene weemämu ituge ätecija, cane lipu itu jiicepene, egä cane Keriso lica gäne, Acejiyame te lui ne ätyepa biname bine niiya cabu ca äsecrerame, yepä cebine teeme niinäce gaabe me ituge ätyepa. ²⁹Mamye magebi lui mamye rooriye tääpu mwene. Yepä mamye rooriye me biname lui te jaaclajutuge teeme gome, teeme mene jäätecijuge, tabe gege birige teeme tagepogogo ätecijame. Yeesu lui mamye rooriye pana gyene, peei name pi cane babo gege gäne teeme tääpume. ³⁰Tabe miiji baborage me äbita, cane matikolä me äbita.

³¹Lui te cabucewe ca täduji, tabe sine baborage iyeta bime cabu ca. Lui te gawecewe cabu ca gyene, tabe gawecewe tääpu myene, siige gawecewe mule poto cidi me jii cemimuge. Yepä cabucewe ca lui te täduji, tabe baborage gyene iyeta poto bime bau ca. ³²Tabe eei bine jeitnäjenenemige, tabe lui bine ituge päpänenä piiyepu tabe lui poto cidi me ituge ätecijana, yepä biname cina lica ecatisi teeme aitneja ne. ³³Yepä laati te liba yaacatuge teeme mene ne, tabe jaawabudnituge, egä Acejiyame lui toraca gyene. ³⁴Acejiyame lui ne tityepuji, tabe Acejiyame me Mene jii cemimuge, ingle Acejiyame te teebine Aceji Seemo iyeta teeme kokre cama ituge ceera. ³⁵Babe te singi gyene teeme Bägrä tääpume, siige iyeta gwidape ituge acrana teeme ime cabu. ³⁶Laati te Bägrä ne jäätrunguge, tabe iyeteta ireclota ne jääpänuge. Yepä laati te Bägrä ne

lica jäätrunguge, tabe pui ireclota ne lica jääpänuge, yepä Acejiyame me claabe te yaanajuge teeme cabu.”

Yeesu piyepu Samariya Magebi

4 ¹Parisea sigu biname cina itecijemige, egä Yeesu bucurage biname bine niye ca jicisäjemige, Yoane nesae bine; cuta teeme abiberäja bāgrā bucurage ge, Yoane me nesae ge. ²Puu Yeesurage te biname bine lica jicisäjemige yepä teeme abiberäja bāgrā cina. ³Yeesu liba umle äbitige, egä Parisea sigu biname cina umle bābitininisi ai potu cidi me, tabe Yuudea probins ne ebmalige, ädige Galilaya probins cabu me. ⁴Taba miiji ge Samariya probins cabu ta otni Galilaya probins ne oomlaname.

⁵Taba liba ädige, taba atyaramtuge yepä Samariya cewe ngii Suuka me. Pui cewe lui calwacupi mameta gyene, Yakobu lui calwacupi teeme bāgrā Yoosepa ne ecāruji. ⁶Yakobu me niye cupicu cuta puga ge. Yeesu worāmu te joomlige, ingle lecaleca padare lipu otnige, siige taba adnatige cupicu gome. Pui lui bimu duusa ge.

⁷Puma cita ca yepä Samariya magebi te toclige niye iitaname. Yeesu jojige egä, “Cāme niye niiti nanime!” ⁸Abiberäja bāgrā puga lica ge. Teepi cewe me beclige deedei aletname. ⁹Siige magebi te Yeesu ne jejige egä, “Maane lui Israela biname gāte, maane lipulipu najite cane Samariya magebi te määme niye iitaname?” Taba naace popi apu jejige, ingle Israela biname piyepu Samariya biname teepi cude padare ge. Teepi gigri deedei gwidape bine lica jääbāmuyājimusi.

¹⁰Yeesu magebi ne jojige egä, “Maane liba umle cirege, egä Acejiyame te ngena bine miiji gyene ceera piyepu cane laasi nāne lui te meebine niye täapume nāätinārīne, maane nātinārejite, cane ireclota niye nāācārejine meebine.” ¹¹Magebi te jejige, “Babo biname, cupicu lui uuglerage gyene, cuta määme iitana gwidape lica gyene; luma cita ca pui ireclota niye ne siitenite? ¹²Nāā, maane baborage gāte mime kaakesaare Yakobu bau ca, ai cupicu ne lui te nicārinuji? Taba ama cita ca niye ne senajenājumi, cuta teeme bāgrā cina piyepu cuta teeme ngeerangerā cibū cina.” ¹³Yeesu jojige egä, “Iyeta, lui cina ai niye ne enenisi, pagege cāāri niyemecewe jajwi. ¹⁴Yepā laati te yaanuge, cane lui niye yāācārune, taba ingwe ca lica pagege niyemecewe jajwi. Cane lui niye yāācārune, teeme cabu waja me läbituge, siige tuudruge iyeteta ireclota täapume.” ¹⁵Piba magebi te jejige, “Babo biname, nācāri pui niye! Piba ingwe ca cane lica pagege niyemecewe jajwi, cuta lica pa twaatnepene aima niye iitanenime.”

¹⁶Yeesu jojige egä, “Āte, määme rooriye ne serwojuti!” ¹⁷Taba jejige egä, “Eewe, cāme rooriye lica gyene.” Yeesu jojige egä, “Toraca gyene, maane lipu najite, egä määme rooriye lica gyene. ¹⁸Maane niināce faib rooriye bine yaawadanemepete, page lui rooriye ne ecananenite,

määmerage rooriye lica gyene peei. Maane peei toraca najite.”¹⁹ Magebi te Yeesu ne jejige egä, “Babo biname, cane ngene ca naagline, egä maane Acejiyame me mename biname gäte.”²⁰ Cine Samariya biname bime kaakesaare cina ai podo cabu irecu lätumutanininusi Acejiyame bau me, yepä weene Israela biname cina jiicuye, egä Acejiyame ne miiji Yerusalema taatu je awejena. Maane lipu ngene jotwananenite ai potocidi me?”²¹ Yeesu jowecnistige egä, “Cäme mene nacati, padare te pa tädepi, biname cina liba lica Acejiyame bau me pagege irecu ätumuta ai podo cabu coo Yerusalema je.”²² Weene Samariya biname toraca umle lica gemi, weene laati bau me irecu lätumutanininuye, yepä cine Israela biname cina umle gemi, cine laati bau me irecu lätumutanininago, ingle Israela biname bime cabu ca gyene biname, lui te pagege biname bine niia cabu ca äsecrera.”²³ Padare te tädenige – siige uja bii tatyaramtige – liba toraca irecu ätumuta biname cina Acejiyame bau me pagege irecu ätumuta teeme seemo ca piyepu toraca ngene atwanena cama. Apu irecu ätumuta biname täapume Acejiyame singi gyene.”²⁴ Acejiyame lui Seemo gyene, siige laatibi teeme bau me irecu lätumutanininusi, teepi miiji irecu ätumuta teeme seemo ca piyepu toraca ngene atwana cama.”

²⁵ Puma cita ca magebi te Yeesu ne jejige egä, “Cane nata umle gäne, egä Mesaya, lui ne yaainusi Keriso ca, pagege otni, siige tabe te iyeta gwidape bine mime bau me pagege aboclomäja.”²⁶ Yeesu jojige egä, “Cane age säne pui biname, lui te mene naajanenine.”

Abiberäja Bägrä cina Täcnärige

²⁷ Puirage padare cabu abiberäja bägrä cina tatyarige, cälu te jitemige, liba Yeesu ne jepänisi magebi cama mene iicema je. Yepä nuuja te lica itemlige, egä tabe ngena täapume singi, cuta magebi cama ngena täapume mene jiicemenige.”²⁸ Puma cita ca magebi te teeme niye iitana gwidape ne ebmalige cupicu gome, oclige babo cewe me, siige biname bine jejemige puma egä,²⁹ “Naaclege biname ne päpäname, lui te umle gyene iyeta, cane ngena ituge waweneträja. Nää pama Keriso sine, Acejiyame te lui ne ätyepame biname bine äsecrerrame niia cabu ca?”³⁰ Siige teepi babo cewe ne sebmalisi, Yeesu bau me seclige.

³¹ Magebi te liba babo cewe jage, abiberäja bägrä cina piba Yeesu ne jejisi egä deedei äbitame.”³² Yepä tabe jejemige egä, “Cäme piti nemi deedei loolo me, weene lui täapume umle cäco gemi.”³³ Abiberäja bägrä cina teemeteme jitransisi, egä nuuja biname te pama bii tewadimige deedei teeme loolo me.”³⁴ Yeesu piba jejemige egä, “Cäme deedei lui eei gyene, cane teeme singi ne wawename lui te cebine itu nätyepuji piyepu ämlitejame tabe lui kaakesea itu näcäruji cane wawename.”³⁵ Weene jiiceniye egä, ‘Cerämu foomabye piti nemi piyeme ärucna padare oomla-name.’ Yepä cane jiicenine, egä calwacupi bine jepänemeye!

Iyeta gwidape kuu cama gemi ärucna täápume. ³⁶Siige ärucna biname te page daremu ne jepänenige, kuu bine etomlecnemige iyeteta ireclota täápume. Siige ätema biname piyepu ärucna biname teepi gigri gege äbitenäsi. ³⁷Ai iicana lui toraca gyene egä, ‘Nuuja te yäätemuge, nuuja te yäärucnimuge.’ ³⁸Cane weebibine itu jityepipene ärucname, weene luma kaakesea lica ituge wawena. Poto cina ituge puma kaakesea wawena, weene yepä ärucna taatu memi.”

³⁹Bucurage biname pui Samariya cewe cabu Yeesu ne jitru-ngisi, ingle pui magebi te lipu teebine jeitnäjige egä, “Tabe umle gyene iyeta cane lui bine ituge wawenetnäja.” ⁴⁰Puma cita ca Samariya biname cina liba eclige Yeesu bau me, teepi jejisi teta cama lenajame, siige tabe puma enajige neeneni bimu cama. ⁴¹Cerämu bucurage biname cina Yeesu ne jitrungisi, teepi liba itecijemige teeme mene. ⁴²Teepi pui magebi ne jojisi egä, “Siige page cine cerämu mäame mene name pi taatu teebine lica jitrunge-nisi, ingle cine cinerage te bii nitecijinige teeme mene. Cine siige umle gemi, egä peese nyene biname, lui te biname bine pa yäasecräremepi niia cabu ca.”

Yeesu Miiji Jewenige Babo Biname me Bägrä ne

⁴³Neeneni bimu ingwe gaabe ca Yeesu Samariya probins ne sebmalige Galilaya probins cabu me ädige, teemerage cewe luma. ⁴⁴Tabe apu ituge iicana egä, “Acejiyame me mename biname ne yaacatusi iyeta poto ta, yepä lica teemerage cewe cabu je.” ⁴⁵Yepä ai taje tabe liba Galilaya probins cabu me ädige, biname cina miijirage jewablisi, ingle teepi niinäce itu yaaclepi Yerusalema babo cewe me äsuplengta bimu ne ngene apecname; siige teepi puga jääpänepesi, Yeesu ngena mule bine jaawenemepi.

⁴⁶Puma cita ca Yeesu Kaana cewe me acnenutige lui Galilaya probins cabu jage. Peese nyene pui cewe, tabe luma niinäce niyerage ne waina niye täápume yaateplingtepi. Galilaya probins cabu Kaprenauma cewe je yepä Rooma gabmani babo biname puga ge, lui me bägrä pita cama ge. ⁴⁷Tabe liba itecijige, egä Yeesu Yuudea probins cabu ca tacnige Galilaya probins cabu me, tabe ädige, siige jejige tabe Kaprenauma cewe me otnime teeme bägrä, lui te budre mameta ge, teebine pita cabu ca miiji wawename. ⁴⁸Yeesu teebine jejige, “Weene liba ciitaca mule piyepu kokre mule bine lica jääpänimuye, weene ätrunga lica birige.” ⁴⁹Yepä tabe Yeesu ne jejige egä, “Yageyame, tädi watata, cije cäme bägrä te budre läbituge.” ⁵⁰Yeesu jejige egä, “Äte acnenuti, mäame bägrä te ireclota gyene!” Siige tabe Yeesu me mene jecatige, acnenutige teeme cewe me. ⁵¹Tabe liba acnenutige, teeme kaakesea bägrä cina teebine potera jewenisi gaabe lamlecu je, jejisi egä, “Mäame bägrä ireclota gyene.” ⁵²Siige tabe itemlimige, egä lui padare cabu tabe gije abacitige

mijji äbitame. Teepi jejisi egä, “Birice bimu duusa kaake poto cidi ca gebale te piba sebmalumi teebine.” ⁵³Babe te ngene jotwige, egä puirage padare cabu Yeesu piba najumi egä, “Määme bägrä ireclota gyene.” Siige tabe teeme binamewale cama Yeesu ne jitrungige.

⁵⁴Ai lui neeneni manu ciitaca mule gyene Yeesu wawename, tabe liba Yuudea probins cabu ca Galilaya probins cabu me tacnenutige.

Yeesu Yepä Biname ne Mijji Jewenige Beteseda Cupicu Gome

5 ¹Ai ingwe gaabe ca Yeesu Yerusalema babo cewe me ädige Israela biname bime yepä soriyomu tääpume. ²Yerusalema lui kula ca atreji ge. Teeme yepä grana ne yaainusi Maamoi grana ca. Pui grana gome cupicu puga ge, lui awaclomteji ge faib caagecage toro mete ca. Heberu mene ca pui cupicu me ngii lui Beteseda. ³Mete gawe me bucurage pita biname ge ätwitäneji: irecu määsumäsu biname, ernge niyaniya biname, nuuja poto tääpe budre biname. Teepi jaawagrijusi niiye apineca padare ne, ⁴ingle nuuja taje Yageyame me mename seemo te täinuge niiye ne iibricname. Lui pita biname te niinäce läglenutuge niiye cabu me, niiye te liba lapinicuge, tabe mijji läbituge teeme pita cabu ca.

⁵Yepä biname puga ge, lui te pita cama senajenäjumi teetieit kämäge ngalebora. ⁶Yeesu teebine jepänige ätwitäneji puma, siige tabe umle ge, egä tabe lecaleca padare pita cama itu senajenäjumi. Tabe puma cita ca itemlige egä, “Nää, maane singi gäte mijji äbitame?” ⁷Pita biname te jejige egä, “Babo biname, nuuja biname lica gyene cebine ätityerame cupicu cabu me acaname, niiye te liba tuudruge. Cane liga căme ca otnime läbitune, nuuja te uja luupluge.” ⁸Yeesu jejige egä, “Arpinanti, määme waaku ne ecati, siige ädi!” ⁹Tabe piba taatu mijji äbitige, teeme waaku ne ecatige, siige ädige.

Yepä pui lui Sabade bimu ge. ¹⁰Israela biname cina jejisi, lui te mijji äbitige egä, “Ai lui Sabade bimu ge. Egäsu cotre gyene maane waaku ne acaname.” ¹¹Tabe jejemige egä, “Lui biname te mijji nawenige, tabe te najige cane waaku ne acatame siige otnime.” ¹²Teepi itemlisi egä, “Laasi nyene pui biname, lui te naajige maane waaku ne acatame siige otnime?” ¹³Yepä lui te mijji äbitige, tabe umle lica ge, egä laati tage, inge bucurage biname puga ge, piyepu Yeesu puma cita ca nuuja gome me uja äyebingtuji. ¹⁴Ingwe ca Yeesu liba teebine jepänige iiwäreja mete caale bora je, tabe jejige egä, “Maane siige mijji gäte page. Ingwe ca niiya mule gone jaawenute, cije maane baborage niiya ne jääpänute.” ¹⁵Puma cita ca pui biname te ädige, Israela biname bine jejemige egä, “Pui lui Yeesu tage, lui te cebine mijji nawenige.” ¹⁶Siige puma cita ca Israela biname cina gije abacitinisi Yeesu ne sabe wawename, inge tabe Sabade bimu cabu pita biname ne mijji jewenige. ¹⁷Yepä Yeesu teebibine jejemige egä, “Căme Babe te iyeta padare cabu kaakesea jewenenige, cane cuta

piiyepu miiji kaakesea wawena.”¹⁸ Yeesu me ai mene name pi Israela biname cina magerage singi äbitininisi teebine budre me aglime, ingle tabe Sabade cotre taatu ne lica jetropangtige, yepä tabe Acejiyame cama yepä me äbitige, teebine lipu Babe ca einige.

Acejiyame me Bägrä me Conocäco Pisi Nyene Gwidape bine Wawename

¹⁹Yeesu Israela biname bine jejemige egä, “Cane toraca jijenininine weebibine, egä Bägrä te nuuja gwidape teemerage singi ca lica jaawenuge, yepä tabe ngena ne jääpänuge Babe te wawena je, tabe cuta pui ne jaawenuge. Babe te ngena ne jaawenuge, cuta Bägrä te pui ne jaawenuge. ²⁰Babe te singi gyene Bägrä täapume, siige jaawabuge iyeta gwidape, tabe lui bine jaawenimuge. Weene jepäniye Bägrä te pita biname ne lipu miiji jewenige, yepä Babe te teebine cerämu potu modamoda kaakesea pagege awaba tabe wawenecame, weene lui cabu ca cälu te pa jitäji. ²¹Babe te lipu biname bine budre cabu ca cirege arpinera siige ireclota ceera teebibine, Bägrä te cuta piiyepu biname bine pagege ireclota ceera, tabe lui bime täapume singi ceerame. ²²Babe te nuuja biname ne lica atrana, yepä tabe Bägrä ne ituge conocäco ceera atrana täapume ²³naace täapume biname cina teebine cuta opo gaabe me acitame, Babe ne lipu opo gaabe me yaacitusi. Laati te Bägrä ne opo gaabe me lica yaacituge, cuta Babe ne piiyepu opo gaabe me lica yaacituge, lui te Bägrä ne tityepuji.

²⁴Cane toraca mene jijenininine, egä laati te cäme mene yäatecijuge, siige jäätrunguge teebine, lui te nätyepuji cebine, tabe iyeteta ireclota ne jääpänuge. Pui biname ne lica pagege atrana, ingle tabe uja ituge budre gaabe ne abmala, siige ireclota gaabe cabu ädenige. ²⁵Cane toraca jijenininine, egä padare te tädenige – siige uja biiri tatyaramtige – budre biname cina liba Acejiyame me Bägrä me tagepogogo ätecija. Laatibi yäatecijemuge, teepi ireclota ne pa jääpänesi. ²⁶Babe te Bägrä ne yepä kokre ituge ceera, teeme lui pisi nyene biname bine ireclota ceerame. ²⁷Cuta tabe Bägrä ne conocäco ituge ceera atrana täapume, ingle tabe Acejiyame bau ca täduji biname me äbituji. ²⁸Cälu te gone jitinuge, egä padare te cire tädepi budre biname cina teeme tagepogogo ne ätecijame teeme gape bora ca, ²⁹siige cire täsipesi puma cita ca. Laatibi miijimiji mule ituge waweneca, teepi ngälu cäco ireclota cabu me cire tarpinärepi. Yepä laatibi niiyaniya mule bine ituge waweneca, teepi atrana täapume cire tarpinärepi teeme mule ibi daremu ne päpäname.”

Yeesu ne Aitneja

³⁰“Cane cäme singi ca äblicäco gäne nuuja mule ne wawena. Cane jaatranimune, Babe te lipu najuge. Cäme atrana lui conocäco gyene, ingle cane cäme singi ne lica jaawenune yepä teeme singi ne jaawenune,

cebine lui te nätyepuji. ³¹Cane liba cämämu laitnäjune, cäme aitneja lui toraca lica birige. ³²Yepä pisi nyene nuuja biname, lui te cebine naitnäjenige. Cane umle gäne, egä teeme aitneja cäme poto cidi me lui toraca gyene. ³³Yoo, weene biname bine täätjepemepeye Yoane niye ca äciseja biname bau me teeme mene ätecijame. Lui toraca gyene, tabe peei ne jaaitnäjepi. ³⁴Cane nuuja singi lica gäne biname me aitneja täápume, yepä cane ai ne naace name pi jiicenine, egä weene pagege ireclota ne päpäname. ³⁵Yoane lui epu pana ge lampa liiyepu, lui te layenuge, siige yaapaclyäruge. Weene singi ge teeme apaclyera cabu matikolä padare lenajame. ³⁶Tabe cebine naitnäjepi, yepä nuuja aitneja cuta pisi nyene, lui baborage gyene. Babe te lui kaakesea itu näcäruji cane wawename, siige cane lui kaakesea jewenenemine, pui cina naitnäjenisi cebine, egä Babe te cebine itu nätyepuji. ³⁷Cuta piiyepu Babe lui te cebine nätyepuji, tabe cuta naitnäjenige. Weene teeme tagepogogo lica ituge ätecija piiyepu teeme opo lica ituge päpäna. ³⁸Teeme mene te weeme cabu lica yaanajuge, ingle weene lica jäärunguye Babe te lui ne ituge ätyepa. ³⁹Weene Oogäräneji mene cabu ca abiberäjininiye, siige apu jingenininige, egä weene iyeteta ireclota ne peema cita ca jääpänuye. Yepä weene ngene ca lica egleniye, egä cäme poto cidi me jiicenige. ⁴⁰Weene äbwäricinininiye cäme bau me otnime ireclota ne päpäname.

⁴¹Cane nuuja singi lica gäne biname cina cebine awepyeräjame. ⁴²Yepä cane umle gäne weeme poto cidi me; cane umle gäne, weeme ngenecu bora nuuja singi lica gemi Acejiyame täápume. ⁴³Cane itu tädepene cäme Babe me ngii cabu, yepä weene lica itu nawablepeye cebine. Nuuja te liba täduge teemerage ngii cabu, teebine weene jaawabluye. ⁴⁴Cuta weene lipulipu ätrungame, ingle weemeweme awepyeräja ne jäärnguye, yepä weene eei awepyeräja ne lica jäärnguye, yepä taatu Acejiyame bau ca lui te täduge. ⁴⁵Weene gone apu jinginuge, egä cane te cirege weebibine Babe me opo gaabe je aitneja. Eewe, weeme aitneja biname lui Moose sine, weene lui cabu me weeme ngene atwanena singi bine ituge acrana. ⁴⁶Weene liga toraca cire jäärungejiye teebine, weene cuta cebine piba nätrungejiye, ingle tabe cäme poto cidi me ituge oogära. ⁴⁷Yepä ingle weene teeme oogäräneji mene ne lica jitrungeniye, peei name pi weene lipulipu ätrungame cäme mene ne.”

Yeesu Faib Tausen Biname bine Engärimige

(*Matayo 14:13-21; Mareko 6:30-44; Luuka 9:10-17*)

6 ¹Ai ingwe gaabe ca Yeesu Galilaya sawa ne yuurige, Tiberiya sawa ca lui ne cuta einenisi. ²Bucurage biname cina teebine ingwe icwisi, ingle teepi itu jääpänanepesi tabe teeme kokre ca pita biname bine miiji wawenena. ³Yeesu podo cabu me teeme abiberäja bägrä cama jegelige, siige puga adnatige. ⁴Pui padare Israela biname bime äsuplengta trii

padare mameta ge. ⁵Yeesu ire acitige, jepänige bucurage biname cina teeme bau me otni je. Tabe puma cita ca Pilipo ne jejige egä, “Mine ai biname bime ibibi deedei luma jeletnenemisi?” ⁶Tabe ai lui naace täápume jiicige Pilipo ne apicetnärame, yepä tabe umle ge, tabe ngena ne jewenenige. ⁷Pilipo Yeesu ne jejige egä, “Mine puu neeneneni hanred silba rarekaake ca buluduu bine liba aletna je, poto cina erwäjini, poto cina abamutenisi.” ⁸Piba teeme nuuja abiberäja bägrä, Simona Peteru me igane Andrea te Yeesu ne jejige egä, ⁹“Ama pisi nyene yepä bägrä, lui me piti nemi faib buluduu piyepu neeneneni bumate cibi, yepä puu ibibi lica gemi iyeta ai biname bime täápume.”

¹⁰Pui cewe cabu puga ge babo baace. Yeesu teeme abiberäja bägrä bine jejemige egä, “Biname bine jejemeye adnateräjame baace papa cabu,” siige teepi adnateräjige. Teepi iyeta lui faib tausen rooriye ge. ¹¹Yeesu buluduu bine ewadimige, Acejiyame ne eso ecäriige, siige biname bine ecäremige, lui cina adnatäreji icrajimige puma. Tabe cuta cibi ecäremige, siige teepi erwäjimisi, teepi luma ngälu singi ge. ¹²Teepi liba iyeta ngene jeglemige, Yeesu abiberäja bägrä bine jejemige egä, “Deedei, cibi pacupacu etomle-cmeyer iyeta, nuuja ne gone yaabmaluye.” ¹³Teepi siige etomlecmisi, lui deedei pacupacu abmalininisi pui faib buluduu cabu ca, biname cina liba erwäjimisi, siige twelb diiba bine jengärimisi apaname.

¹⁴Biname cina liba jepänisi ai ciitaca mule ne, Yeesu lui jewenige, teepi jiicisi egä, “Toraca, ai lui Acejiyame me pui mename biname gyene, mine lui ne jewagrijenisi otnime.” ¹⁵Yeesu umle ge egä, “Teepi teeme singi ca cebine acitame naweninisi mope biname täápume, yepä cäme singi lica ge.” Siige tabe cääri taatu ädige podo cabu me.

Yeesu Niiye papa cabu Otnige
(*Matayo 14:22-33; Mareko 6:45-52*)

¹⁶Liba mämleteca me, abiberäja bägrä cina piba podo cabu ca täänitnige, sawa ligi me eclige, ¹⁷poo cabu me acetnäriige, siige sawa ne yuurisi Kaprenauma cewe me äcnärame. Teepi liba sawa cabu jage, ciiye te piba tumlige, yepä Yeesu cäro camu ge teeme bau me atyaramta. ¹⁸Buuwe te kokre cama tipwäjige, siige uule kuu cina modamoda me äbitininisi. ¹⁹Abiberäja bägrä cina liba poo ne biiri ewäcisi faib kilomiita pana padare me doro cabu ca, teepi puma cita ca jepänisi Yeesu ne niiye papa cabu otni je poo gome me, siige teepi mage wälu ge. ²⁰Yepä Yeesu teebibine jejemige egä, “Wälu gone, cane säne!” ²¹Piba teepi singi ge teebine acenutame, siige piba taatu poo te doro ne joomlige, teepi liiyeme singi ge otnime.

Biname cina Yeesu ne Jirngisi

²²Nuuja bimu cabu lui biname cina sawa nuuja poto doro cabu itu tabmalimesi, teepi umle äbitininisi egä, “Yepä taatu poo lui te birice

aga ge, abiberäja bägrä cina pui gaabe suurumesi sawa nuuja poto doro me, cuta Yeesu teta cama lica tädumi.” ²³Piba poto poo cina seclige Tiberiya cewe cabu ca eeyeme, teepi luma deedei bine serwäjimumesi, Yageyame te lui deedei täapume Acejiyame ne eso secärumi. ²⁴Lui cina puga ge piiyepu lui cina seclige, teepi liba umle äbitininisi egä, “Yeesu ama lica gyene, cuta abiberäja bägrä lica gemi,” teepi poo cabu me acetneräjininisi, Kaprenauma cewe me yuurisi Yeesu ne ärngime.

Yeesu Lui Ireclota Deedei Gyene

²⁵Lui biname cina Yeesu ne jirngisi, teepi teebine puma jepänisi sawa nuuja poto doro je, siige itemlisi egä, “Abiberäja biname, maane cuta liba tädite aima?” ²⁶Yeesu jejemige egä, “Cane toraca jijenininine weebibine, egä weene cebine naace name pi lica närngeniye, ingle weene ciitaca mule bine itu tepänanemumeye cäme bau ca. Yepä weene naace popi närngeniye, ingle weene ibibi deedei bine serwäjimumeye. ²⁷Weene gone watata deedei bine jäärngemuye, yepä eei deedei ne jirngepeye, lui te iyeteta ireclota biname bine yäcäranemuge. Lui te Acejiyame bau ca täduji biname me äbituji, tabe te pa icäripi weebibine pui deedei, ingle Aceji Babe te teebine ituge conocäco ceera peei ne wawename.” ²⁸Teepi Yeesu ne itemlisi egä, “Cine miiji ngena wawena, egä cine Acejiyame me kaakesea bine jaawenimusi?” ²⁹Yeesu jejemige egä, “Peei lui Acejiyame me kaakesea gyene weeme cabu, egä weene cebine nätrungeniye, tabe lui ne nätyepuji.” ³⁰Teepi jejisi egä, “Maane ngena ciitaca mule ne jewenenite cine päpäname siige cine piba meebine ätrungame? Maane ngena jewenenite? ³¹Maane lipu gäte cibibine maana deedei ceerame, cime kaakesaare cina lui deedei bine serwäjenanemumesi daapo taatu cewe cabu je. Oogäräneji mene te jiicenige ai poto cidi me egä, ‘Acejiyame te cabucewe ca teebibine deedei secäranemuji.’ ”

³²Yeesu jejemige egä, “Cane toraca jijenininine, egä Moose cabucewe ca weebibine deedei lica icäraninuji, yepä cäme Babe te toracarage deedei cabucewe ca sicäraninuge. ³³Acejiyame me deedei lui tabe sine, cabucewe ca lui te täduji biname bine ireclota ceerame.” ³⁴Teepi puma cita ca Yeesu ne jejisi egä, “Babo biname, maane pui deedei iyeta padare cabu nicäranipi.” ³⁵Yeesu jejemige egä, “Cane säne pui ireclota deedei. Lui te cäme bau me täduge, tabe lica pagege loolomecewe jajwi. Cuta lui te cebine nätrunguge, tabe lica pagege niyemecewe jajwi. ³⁶Yepä cane weebibine ituge jaji, egä weene itu näpänanumeye cebine, yepä weene ätrunga lica gemi. ³⁷Iyeta lui cäme Babe te näcäranuge, teepi cäme bau me saacluge, piiyepu laati te cäme bau me täduge, cane lica yäyecräjune. ³⁸Cane cabucewe ca lica tädujine cäme singi ne wawename, yepä cane tädujine teeme singi ne wawename, lui te cebine nätyepuji. ³⁹Piiyepu lui te cebine nätyepuji, tabe singi gyene, egä cane

nuuja ne lica apesera tabe lui cebine ituge ceera, yepä cane teebibine ireclota cabu me cire yaarpināremepene cerācerāgāābu bimu cabu je. ⁴⁰Cāme Babe te singi gyene, egä iyeta lui cina nāpānusi cane teeme Bāgrā ne piyepu nātrungusi, teepi iyeteta ireclota ne cire jāāpānepesi piyepu cane teebibine cire yaarpināremepene cerācerāgāābu bimu cabu je.”

⁴¹Israela biname cina gije abacitinisi Yeesu ne āngejame, ingle tabe lipu jiicige egä, “Cane sāne deedei, lui te cabucewe ca tādujine.” ⁴²Teepi jiicisi egä, “Cije ai lui Yeesu lica gyene, Yoosepa me bāgrā. Cine umle gemi teeme mage babe. Cije tabe piba lipulipu jiicenige, egä tabe cabucewe ca itu tāduji.” ⁴³Yeesu teebibine jejemige egä, “Weene peei āngeja mene ne ebmaleye! ⁴⁴Nuuja te āblicāco cāme bau me otni, liba Babe lui te cebine nātyepuji, teebine lica taawenuge cāme bau me otnime, siige cane teebine ireclota cabu me cire yaarpinantepene cerācerāgāābu bimu cabu je. ⁴⁵Acejiyame me mename biname cina itu yoogārujisi egä, ‘Acejiyame te iyeta biname bine pagege abiberāja.’ Iyeta lui cina Babe ne jāātecijsi, teeme bau ca labiberājiniusi, teepi cāme bau me saacluge. ⁴⁶Ai lui naace tāāpume lica gyene, egä nuuja te ituge Babe ne pāpāna, yepä tabe taatu lui te Babe bau ca tāduji, tabe te teebine ituge pāpāna. ⁴⁷Cane toraca jijenininine: laati te birige ātrunga, tabe ireclota ne jāāpānuge.

⁴⁸Cane lui ireclota deedei gāne. ⁴⁹Weeme kaakesaare cina daapo taatu cewe cabu puu maana deedei ne serwājenanemumesi, yepä teepi budre tābitenājimesi. ⁵⁰Yepä laati te liba jaarwuge cabucewe ca lui deedei te tāduge, tabe budre ne lica jāāpānuge. ⁵¹Cane age sāne pui ireclota deedei, cabucewe ca lui te tādujine. Laati te liba ai deedei jaarwuge, tabe iyeteta yaanajuge. Cane lui deedei ceera, cāme tāāpe gyene, cane lui ne pagege āyemela biname cina iyeteta ireclota ne pāpāname.”

⁵²Puma cita ca Israela biname cina gije abacitinisi teemeteme atraname egä, “Tabe lipulipu mibibine teeme tāāpe ceera mine arwime?” ⁵³Yeesu jejemige egä, “Cane toraca jijenininine: weene liba cāme tāāpe ne lica jaarwuye, Acejiyame bau ca lui te tādujine biname me ābitujine, piyepu liba lica cāme uudi ne yaanuye, weeme cabu ireclota lica birige. ⁵⁴Yepä laati te cāme tāāpe ne jaarwuge piyepu cāme uudi ne yaanuge, tabe iyeteta ireclota ne jāāpānuge, siige cane teebine ireclota cabu me cire yaarpinantepene cerācerāgāābu bimu cabu je. ⁵⁵Cāme tāāpe lui toraca deedei gyene, cāme uudi lui toraca niiye gyene. ⁵⁶Laati te cāme tāāpe ne jaarwuge, cāme uudi ne yaanuge, tabe cāme cabu yaanajuge, cane teeme cabu nanajuge. ⁵⁷Ireclota Babe te cebine nātyepuji, siige cane teeme cabu ca ireclota ituge pāpāna. Pipu pi laati te cāme tāāpe ne jaarwuge, tabe cāme bau ca ireclota ne jāāpānuge. ⁵⁸Ai pui deedei gyene, cabucewe ca lui ituge otni. Ai lui epu deedei lica gyene, weeme

kaakesaare cina lui ne serwanenanumesi, yepä teepi äblicäco ge budre cabu ca uocratna. Yepä laati te ai deedei jaarwuge, tabe iyeteta yaanajuge.”

⁵⁹Yeesu iyeta ai mene jicemige Kaprenauma cewe je, tabe liba biname bine ebiberäjimige teeme abasecretna mete cabu.

Mene Iyeteta Ireclota täápume

⁶⁰Yeesu ne lui cina ingwe icwisi, teepi liba itecijemige ai mene, teeme bucurage cina jicisi egä, “Ai abiberäja lui mage mäpurage gyene. Laati te miiji gyene ai ne acatame?” ⁶¹Nuuja te Yeesu ne lica jejige, yepä tabe umle äbitige, teepi ngena poto cidi me jitranisi, siige tabe itemlimige egä, “Nää, cäme abiberäja te weebibine niija opo me jiwenininige? ⁶²Cije piba lipu gyene, weene liba äpäna je Acejiyame bau ca lui te täduji biname me äbituji acnenuta cabucewe me, tabe luma niinäce ituge. ⁶³Aceji Seemo te biname bine ireclota me jaawenimuge, teepi teeme ca äblicäco nuuja gwidape wawena. Cane lui mene bii jijanininine, Aceji Seemo piyepu ireclota cama. ⁶⁴Yepä weene poto cina cebine lica nätrungeniye.” Yeesu ai mene naace name pi jicige, ingle tabe ujarage umle äbituji, laati bemi lica teebine ätrunga piyepu laati te teebine budre me pa jaawabepi.

⁶⁵Puma cita ca tabe cääri jicige egä, “Ai ingle name pi cane bii jijinine weebibine, egä nuuja te äblicäco gyene cäme bau me otni, Babe te liba lica teebine jaawenuge otnime.”

⁶⁶Yeesu me ai mene name pi bucurage teeme ingwe ca äcwi biname cina teebine ebmalisi, siige teta cama lica otninisi. ⁶⁷Piba Yeesu teeme twelb abiberäja bägrä bine itemlimige egä, “Weene nää cuta singi gemi cebine abmalame?” ⁶⁸Simona Peteru te jewecnistige teeme mene egä, “Yageyame, cije cine ingwe ca laati bau me otni? Määme piti nemi mene iyeteta ireclota täápume! ⁶⁹Cine siige näätrungenisi piyepu umle gemi, egä maane peese näte, Acejiyame te lui ne mara me ituge wawena teeme täápume.” ⁷⁰Yeesu teebibine jejemige egä, “Cane weene twelb bine puu iyeta itu jijäcripene, yepä weeme yepä cabu pisi nyene Satani.” ⁷¹Yeesu Yuuda, Simona Isakariyota me bägrä täápume jicige. Ngänuge, tabe puu teeme twelb abiberäja bägrä cabu ca yepä ge, tabe te teebine budre me pa jaawabepi.

Yeesu piyepu Teeme Iganewale

7 ¹Ai ingwe gaabe ca Yeesu Galilaya probins cabu ta otnetnäjjige. Tabe singi lica ge cääri cuta Yuudea probins me otnime, ingle Israela biname cina puma padare ne jirngisi teebine budre me acitame. ²Padare te mameta me äbitige Israela biname bime Wäbuyaga mete trii täápume. ³Siige iganewale cina Yeesu ne jejisi egä, “Ai cewe ne ebmali, Yuudea me ädi, piba määme ingwe äcwiyame biname cina jepänenemisi maane lui

mule bine jewenenemite, ⁴ingle laati te singi birige biname cina teeme poto cidi me umle äbitame, tabe nuuja mule ne ogä lica jaawenuge. Yoo, ingle maane apu mule bine jaawenanemute, maane miiji pajecu me äbita biname cina mäame poto cidi me umle äbitame.” ⁵Teeme iganewale cina naace popi ai mene jiicisi, ingle cuta teepi teebine lica jitrungisi. ⁶Yeesu jejemige egä, “Iyeta padare cabu weeme täapume papa gyene otni, yepä cäme padare te camu gyene atyaramta. ⁷Ai gawecewe biname bime nuuja ingle lica gyene weebibine ämugetname, yepä teepi cebine nämugetnusi, ingle cane jeitnäjenenemine, egä teeme mule lui niyarage gemi. ⁸Äte naaclege weene ai trii täapume. Cane lica ädenine, ingle cäme täapume miiji padare lica gyene otnime.” ⁹Tabe apu jiicige, siige Galilaya je enajige.

Yeesu Wäbuyaga Mete Trii cabu

¹⁰Yepä iganewale cina liba beclige trii täapume, Yeesu teeme ingwe ca piba ogä ädige, ingle tabe singi lica ge biname cina umle äbitame teeme otni poto cidi me. ¹¹Yerusalemä je puma Israela biname cina teebine trii biname bime sobe cabu jirngisi. Teepi biname bine itemläjemisi egä, “Lese nyene pui biname?” ¹²Biname cina siiyä mene ca ajananinisi teeme poto cidi me. Poto cina jiicisi egä, “Tabe lui miiji biname gyene.” Poto cina jiicisi egä, “Eewe, tabe miiji biname lica gyene. Tabe biname bine yaangletnäjemuge.” ¹³Yepä teepi cabucabu lica jiicemisi teeme poto cidi me, ingle teepi wälu ge Israela biname bime täapume.

¹⁴Trii padare lamlecu je Yeesu iiwäreja mete me abacitige biname bine abiberäjame. ¹⁵Israela biname cina cälu te jitemige, jiicisi egä, “Tabe lipulipu baborage umle gyene. Tabe nuuja abiberäja cabu me lica ituge otni.” ¹⁶Yeesu jejemige egä, “Cäme abiberäja lui cäme lica gyene, yepä Acejiyame myene, lui te cebine itu nätyepuji. ¹⁷Laasi nyene liba singi Acejiyame me singi ne wawename, tabe umle pa läbitepi, egä cäme abiberäja lui Acejiyame te itu näcäruji coo cane nää cämerage mene jiicemenine. ¹⁸Laati te liba teemerage ngene atwanena mene jiicemuge, tabe teeme täapume awepyeräja ne jäärnguge. Yepä laati te teeme täapume awepyeräja ne jäärnguge, teebine lui te itu tityepuji, tabe lui conocäco gyene piyepu teeme cabu nuuja walya lica gyene. ¹⁹Egäsu Moose nata weebibine Cotre icärininuji, yepä weeme nuuja te lica Cotre bine yäcwetnimuge. Weene ngena name pi cebine aglime naweniniye?”

²⁰Biname cina teebine jejisi egä, “Eewe, cine meebine aglime lica naawenenisi. Mäame niya cable pisi nyene!” ²¹Yeesu jejemige egä, “Weene cälu te jitipi, cane lipu yepä gäabu Sabade bimu cabu kaakesea jaawenepene. ²²Moose te cotre icärininuji weene weeme täape matikolä iirputame Acejiyame me cewecu acata täapume. (Puu toraca Moose te lica ge, yepä mime kaakesaare cina jegednu-jisi pui mule ne.) Siige

weene pui cewecu bägrä ne jaawenuye tääpe iirputa ca, ngänu gyene liba Sabade bimu. ²³Yoo siige, weene liba bägrä me tääpe cabu cewecu jaawenuye Sabade bimu cabu naace tääpume Moose me cotre ne äcwetname, weene piba ngeno memi claabe, cane liba biname ne iyeta miiji jaawenepene Sabade bimu cabu. ²⁴Ätecitipeye papapapa atrana mule, miiji weene niinäce cängena ingle ne ärngi, piba atrana.”

Yeesu nää Keriso Sine?

²⁵Poto Yerusalema biname cina jiicisi egä, “Cije ai lui pui biname lica gyene, teepi lui ne aglime jewenenisi? ²⁶Weene jepäneye, tabe lipu pajecurage jiicemenige, yepä teepi nuuja mene lica ge! Ire taatu jetwisi! Pama modamoda biname cina umle bäbitininisi, egä toraca tabe Keriso sine biname bine niiya cabu ca äsecerame? ²⁷Yepä tabe äblicäco gyene Keriso lenaja, ingle mine umle gemi, egä tabe luma cita ca gyene. Keriso te liba otni, nuuja biname te umle lica gyene, egä tabe luma cita ca gyene.”

²⁸Yeesu iiwäreja mete caale bora je biname bine ebiberäjimige. Tabe baborage tagepogogo ca jiicemige egä, “Yoo, weene umle gemi cane, piiyepu weene umle gemi cane luma cita ca gäne. Yepä cane căme singi ca lica itu tädujine. Lui te cebine itu nätyepuji, tabe sine toraca, yepä weene umle lica gemi tabe. ²⁹Cane umle gäne tabe, ingle cane teeme bau ca itu tädujine. Tabe te cebine nätyepuji.” ³⁰Piba teepi singi ge teebine oomlaname, yepä nuuja te ime ne lica ecitige teeme papa cabu me, ingle teemerage padare te camu ge atyaramta. ³¹Bucurage biname cina teebine jitrungisi, siige teemeteme ätemläjinisi egä, “Keriso liba cire tädepi, nää tabe pama cerämu apu poto ciitaca mule bine cire jaawenemepi ai biname te lipu jewenenemige?”

Iiwäreja Mete Awamuta Biname bine Jityepimisi Yeesu ne Oomlaname

³²Parisea sigu biname cina itecijemige, biname cina lipu siiyā mene ca jiicemisi Yeesu poto cidi me, siige teepi modamoda iiwäreja biname cama poto iiwäreja mete awamuta biname bine jityepimisi Yeesu ne oomlaname. ³³Yeesu biname bine jejemige egä, “Cane matikäli padare cerämu nanajinige weene cama, piba cane teeme bau me pa lacnenutepene, cebine lui te nätyepuji. ³⁴Weene piba cebine pa närngepeye, yepä weene lica pa näpänepeye, ingle weene äblicäco gemi otni, cane lui puupu cabu me pa lädepene lenajame.”

³⁵Puma cita ca Israela modamoda biname cina teemeteme jitransisi egä, “Tabe baa liiyeme otnime äbitinige, siige piba mine äblicäco teebine päpäna? Nää, tabe pama ngene jotwanenige Griik gawe cabu me otnime, Israela biname cina luma icrajinige, siige puma Griik biname bine abiberäjame? ³⁶Ngena tääpume tabe apu jiicige egä, ‘Weene cebine pa

närngepeye, lica pa näpänepeye,' cuta egä 'Cane liiyeme pa lädepene lenajame, weene äblicäco piiyeme otni.' Tabe ngena tääpume pepu jiicige?"

Ireclota Niiye

³⁷Trii padare me ngälugaabe bimu lui baborage gyene. Yeesu piba abujängtige, baborage tagepogogo ca jiicige egä, "Laati te liba niiyemecewe, tabe miiji căme bau me otni niye nanime! ³⁸Mene oogărăneji gyene, egä laati te cebine nătrunguge, ireclota niye te teeme ngenecu cabu ca tuudruge." ³⁹Yeesu ai mene Aceji Seemo poto cidı me jiicige. Laatibi Yeesu ne jäätrungusi, teepi pagege Aceji Seemo ne păpäna. Pui padare cabu teebine căro camu ge ätyepa, ingle Yeesu camu ge acnenuta cabucewe me teeme apacıyera cabu me.

Biname cina Abelaninisi Yeesu name pi

⁴⁰Laatibi Yeesu me ai mene itecijemige, teeme poto cina jiicisi egä, "Toraca, ai biname lui pui mename biname gyene, mine lui ne jewagrijenisi." ⁴¹Poto bime ngene atwanena apu ge egä Yeesu lui Keriso sine, Acejiyame te lui ne cirege ätyepa biname bine niya cabu ca äsecerame. Yepä poto cina jiicemisi egä, "Keriso äblicäco Galilaya probins cabu ca otni, ⁴²ingle Oogărăneji mene te jiicenige egä tabe Daawida me kaakesaare gyene, siige tabe Daawida me cewe Betelehema cabu ca cire tädepi." ⁴³Puma cita ca biname cina abelaninisi Yeesu miiji pi. ⁴⁴Poto cina singi ge teebine oomlaname, yepä nuuja te ime ne lica ecitige teeme papa cabu.

Israela Modamoda Biname Ätrunga căco Ge

⁴⁵Iiwäreja mete ne lui cina jaawamutusi, modamoda iiwäreja biname piyepu Parisea sigu biname cina lui bine jityepimisi Yeesu ne oomlana tääpume, siige teepi ime taatu äcnärige. Lui cina teebibine jityepimisi, teepi itemlimisi egä, "Weene ngena name pi teebine lica secaniye aima?" ⁴⁶Awamuta biname cina jejemisi egä, "Cine nuuja biname ne niinäce lica ituge ätecija apu mene iicema cabu je." ⁴⁷Piba Parisea sigu biname cina jejemisi egä, "Oo siige, tabe cuta weebibine bingletnäjinige? ⁴⁸Weene năä ituge ätecija, egä Parisea biname bime yepä te coo modamoda biname bime yepä te teebine jitrungenige? ⁴⁹Yepä ai papa biname, lui bime cabu Acejiyame me claabe pisi nyene, ingle teepi umle lica gemi Moose me Cotre, teepi te jitrungenisi teebine." ⁵⁰Nikodemo, lui pui Parisea biname bime cabu ca yepä ge piyepu lui te Yeesu ne niinäce yăädărepi ciıye cabu je, tabe jejemige egä, ⁵¹"Mime Cotre te nijenininige, egä mine äblicäco biname ne papa atrana. Mine miiji niinäce teebine ätecija piyepu umle äbita, egä tabe ngena ne ituge wawena." ⁵²Puma cita ca teepi jejisi egä,

“Cuta maane peese näte nuuja Galilaya biname! Maane Oogäräneji mene miiji abiberäjepi umle äbitame, egä Acejiyame me nuuja mename biname te Galilaya probins cabu ca lica cire tädepi.” ⁵³Siige puma cita ca teepi iyeta mete me etengläjisi.

Sargi Magebi

8 ¹Yeesu Olibi Uli podo cabu me ädige. ²Nuuja bimu krokerage tabe cuta cääri acnenutige iiwäreja mete cabu me. Biname cina abasecretnige teeme bau me, siige tabe adnatige, gije abacitige teebibine abiberäjame. ³Puma cita ca cotre abiberäja biname piiyepu Parisea sigu biname cina yepä magebi ne tocanisi, lui ne jwoomlisi sargi mule wawena cabu, biname sobe cabu ocitisi, ⁴siige Yeesu ne jejisi egä, “Abiberäja biname, cine ai magebi ne sargi mule wawena cabu twoomlisi. ⁵Moose me Cotre te apu nijinininige, egä apu muleyame biname bine miiji kula ca äbyecra budre me aglime. Maane lipu ngene jotwanenite ai poto cidi me?” ⁶Teepi ai mene naace name pi jejisi, ingle teepi singi ge teebine mene cabu oomlaname, siige ingle ne päpäname teebine aitnejame. Yeesu äcupige, ime kukluta ca mene yoogäridge gawe cabu. ⁷Teepi liga teebine tii jewenanisi, tabe jeclajutige, jejemige egä, “Weeme cabu liba biname pisi nyene, lui te umle cäco niiya mule wawena, tabe te niinäce kula ne yaajarege teeme cabu me.” ⁸Tabe cuta cääri äcupige, gawe cabu ngii yoogäridge. ⁹Teepi liba Yeesu me mene itecijemige, teepi ngene ca eglisi egä cime niiya mule piti nemi. Siige teepi gije abacitinisi yepäyepä atenglejame, modamoda biname cabu ca ngälu matimati biname, ngälu Yeesu taatu te ityepurige pui magebi cama, teeme opo gaabe je lui te joclajutige. ¹⁰Piba Yeesu jeclajutige, utemlige egä, “Magebi, lete nemi teepi, lui cina meebine naacanisi aima kula ca äbyecrame? Cije teepi lica jewenisi peei mule ne?” ¹¹Tabe jejige egä, “Eewe babo biname.” Puma cita ca Yeesu jojige egä, “Cane cuta meebine kula ca lica naacnenine. Äte ocli, ingwe ca niiya mule gone jaawenute!”

Yeesu Apaclyera Gyene Biname bime tääpume

¹²Yeesu liba biname bine cääri ebiberäjimige, tabe jejemige apu egä, “Cane age säne apaclyera ai gawecewe tääpume. Laati te cebine ingwe näcwuge, tabe krokeciye cabu lica waatnuge, ingle tabe apaclyera ne jääpänuge teeme ireclota tääpume.” ¹³Puma cita ca Parisea sigu biname cina Yeesu ne jejisi egä, “Maane määmämu aitänenite, pipu pi mäame aitneja lui toraca lica gyene.” ¹⁴Yeesu jejemige egä, “Cane puu cämämu aitänenine, yepä cäme aitneja lui papa me lica äbitenige, ingle cane umle gäne, cane luma cita ca gäne piiyepu liiyeme ädenine. Yepä weene nuuja umle lica gemi, cane luma cita ca gäne piiyepu liiyeme ädenine. ¹⁵Weeme atrana lui biname bime pana gyene. Cane nuuja biname ne

licarage pa jaatranepene. ¹⁶Yepä cane liba atrana je, cäme atrana lui conocäcorage ge, ingle cane taatu lica gäne. Babe lui te cebine nätyepuji, tabe cane cama gyene. ¹⁷Nata weeme Cotre mene te cuta jiicenige, egä neeneni biname bime aitneja lui ibibi birige. ¹⁸Yoo siige, cane cämämu aitnäjenine piyepu Babe, lui te cebine nätyepuji, tabe cuta naitnäjenige cebine.” ¹⁹Puma cita ca teepi Yeesu ne itemlisi egä, “Baa, lese nyene mäame babe?” Yeesu jejemige egä, “Weene umle lica gemi cane piyepu cäme Babe. Weene liga umle cirege cane, weene cuta piba umle cirege tabe.”

²⁰Yeesu ai mene jiicemige, tabe liba biname bine ebiberäjimige iiwäreja mete caale bora je rarekaake acrana puupu gome. Siige nuuja te teebine lica joomlige, ingle teeme padare te camu ge atyaramta.

“Weene Äblicäco Gemi Otni, Cane Liiyeme Ädenine”

²¹Yeesu biname bine cääri mene jejanemige. Tabe apu jiicige egä, “Cane ama cita ca äyebtingtenine. Weene pa närngepeye cebine, yepä weene weeme niya mule cabu budre cire äbitipeye. Weene äblicäco gemi otni, cane liiyeme ädenine.”

²²Puma cita ca Israela biname cina jiicisi egä, “Nää, tabe pama teemämu aglime pa läbitepi, ingle tabe jiicige egä, ‘Weene äblicäco gemi otni, cane liiyeme pa lädepene?’ ” ²³Yeesu jejemige egä, “Weene lui gawecewe cabu ca gemi, yepä cane lui cabucewe cabu ca gäne. Weene ai gawecewe tääpu memi, yepä cane lica gäne ai gawecewe tääpume. ²⁴Cane jijinine, egä weene budre läbitininuye weeme niya mule cabu. Weene liba ätrunga lica birige, egä cane pui biname gäne, cane lui poto cidi me jiicenenemine, weene toraca budre cire äbitipeye.” ²⁵Teepi puma cita ca teebine itemlisi, “Baa, maane laasi näte?” Yeesu jejemige egä, “Cane uja weebibine lipu ituge jaji? ²⁶Cäme bucurage mene piti nemi weeme poto cidi me iicemame piyepu weebibine ablawejame. Yepä cane peei taatu mene jaajananemune biname bine, cane lui mene nätecijanuge teeme bau ca, cebine lui te nätyepuji. Tabe lui toraca gyene.”

²⁷Teepi opo lica ewatnisi, egä Yeesu Babe poto cidi me jiicige. ²⁸Puma cita ca Yeesu teebibine cuta cääri jejemige egä, “Weene liba pa nawepäntepeye cebine, Acejiyame bau ca lui te tädujine biname me äbitujine, piba weene umle pa äbitipeye, egä cane pui biname gäne, cane lui poto cidi me jiicemimune. Cane nuuja gwidape ne cäme singi ca lica jaawenune, yepä Babe te ngena ituge abiberäja cebine, cane peei poto cidi me taatu jiicemimune. ²⁹Lui te cebine nätyepuji, tabe pisi nyene cane cama. Tabe cebine taatu lica ituge abmala, ingle cane ngena bine jaawenetnäjimune, peei cina teebine ngenecu miiji me jaawenusi.” ³⁰Bucurage biname cina Yeesu ne jitrungisi, teepi liba itecijemige tabe apu iicema je.

Laati Bemi Toraca Abrahamo me Bägräwale

³¹Lui Israela biname cina Yeesu ne jitrungisi, tabe teebibine jejemige egä, “Weene liba căme abiberăja ne kokre cama joomle-niye, weene căme toracarage abiberăja băgră gemi piba. ³²Piba weene umle läbitininuye, toraca ngena gyene, siige pui toraca te weebibine kälyä jiwenininuge.” ³³Teepi opo lica jewatnisi, Yeesu ngena täápume jejemige, siige teepi jejisi egä, “Cine lui Abrahamo me kaakesaare gemi. Cine nuuja biname me aletnäneji biname lica gemi, cije maane ngena name pi nijinite cine kälyä äbitame?”

³⁴Yeesu jejemige egä, “Căme mene nacatye: iyeta lui cina niiya mule bine yaacnemusi, pui niiya mule cina teebibine kokre joomle-musi epu pana, aletnäneji biname ne teeme yageyame te lipu kokre joomluge. ³⁵Aletnäneji^a biname te iyeteta lica yaanajuge teeme babo biname me mete cabu. Yepä băgră te iyeteta teeme babe me mete cabu yaanajuge. ³⁶Siige Bägră te liba weebibine kälyä jiwenininuge niiya mule cabu ca, weene piba toraca kälyä birige. ³⁷Yoo, cane umle găne, egä weene Abrahamo me kaakesaare gemi. Yepä weene cebine aglime naweniniye, ingle weene singi lica gemi căme mene ätecijame. ³⁸Cane jijaneninune, cane ngena ituge păpăna Babe me gome. Weene cuta piyepu jaawenimuye, weeme babe te ngeno me jijaneninuge weebibine.”

³⁹Teepi jejisi egä, “Cime babe Abrahamo sine.” Yeesu jejemige egä, “Weene liga Abrahamo me băgră cirege, weene epu mule bine cire jaawenemejiye tabe liiyepu. ⁴⁰Yepä weene siige cebine aglime naweniniye, ingle cane toraca mene poto cidid me ituge jajanena, Babe bau ca cane lui mene ituge ätecijana. Abrahamo weeme pana lica äbituji. ⁴¹Weene weemerage babe ne jitudaneniye.” Teepi puma cita ca Yeesu ne jejisi egä, “Cine babe căco biname lica gemi. Cime yepä taatu Babe pisi nyene. Tabe lui Acejiyame sine.” ⁴²Yeesu jejemige egä, “Liga Acejiyame weeme Babe cirege, weene piba căme täápume singi cirege, ingle cane teeme bau ca tädujine, siige cane page age săne. Cane căme singi ca lica tädujine, yepä tabe te cebine nätyepuji. ⁴³Weene ngena name pi căme mene umle lica gemi? Weene naace name pi umle lica gemi căme mene, ingle weeme tablame bermemiye căme mene ätecija wălu name pi. ⁴⁴Satani peese nyene weeme babe, siige weene weeme babe me singi bine jaawenemuye. Tabe lui agliyame gyene agedna cabu ca ngălu page. Tabe toraca mene ne jigyenige, ingle teeme bau ca cude padare gyene. Tabe liba walya waatromuge, tabe teemerage mule ne jaawenuge; tabe walya biname gyene, babe gyene iyeta walya täápume. ⁴⁵Cebine weene

^a 8:35 aletnäneji biname: Nuuja taje cuta nuuja te jaaletnuge pui biname ne coo yageyame te jaajuge egä, “Maane siige căme cabu ca, măăme singi gaabe ädepi.”

pui name pi lica nätrunguye, ingle cane jiiemimune, ngena gyene toraca. ⁴⁶Baa, weeme nuuja te jaawabudnitege, egä cane ngena niiya ne ituge wawena. Cane liba toraca mene poto cidi me jiiemune, weene piba ngena name pi lica cebine nätrunguye. ⁴⁷Laati te Acejiyame bau ca gyene, tabe te teeme mene jättecijuge. Yepä weene Acejiyame me bägräwale lica gemi, peei name pi weene lica teebine jättecijuye.”

Yeesu piiyepu Abrahamo

⁴⁸Israela biname cina Yeesu ne jejisi egä, “Cime mene pama toraca gyene, egä maane Samariya biname gäte, cuta mäame niiya cable pama pisi nyene?” ⁴⁹Yeesu teebibine icisäremige egä, “Eewe, cane niiya cable cama lica gäne. Cane cäme Babe ne opo gaabe me ecitenine, yepä weene cebine opo gaabe me lica naciteniye. ⁵⁰Cane singi lica gäne cäme ngii te babo äbitame. Nuuja te pisi nyene, lui te singi ge cäme ngii te babo äbitame. Tabe te biname bine cirege atrana. ⁵¹Cane toraca jijenininine weebibine, egä laati te cebine nätrunguge, tabe budre lica läbituge.” ⁵²Puma cita ca Israela biname cina jejisi egä, “Siige cine aga toraca umle bäbitininago, egä mäame niiya cable pisi nyene. Abrahamo uja budre äbituji, piiyepu Acejiyame me mename biname cina uja budre äbitininujisi, siige maane piba cije lipu jiićenite, egä laati te liba mäame mene yättecijuge, tabe budre lica läbituge. ⁵³Nata maane baborage lica gäte mime kaakesaare Abrahamo bau ca, lui te budre itu läbitepi. Piiyepu mename biname cina budre ituge äbita. Maane lipu ngene jotwaninite, egä maane baa laasi näte?”

⁵⁴Yeesu teebibine jejemige, “Cane liba cämämu babo läbitune, peei lui toraca lica ge. Yepä Babe te cäme ngii ne babo jaawenuge, weene lui ne weeme Acejiyame ca eineniye. ⁵⁵Weene lica ituge umle äbita teeme poto cidi me, yepä cane umle gäne tabe. Cane liba iicana je, egä cane umle lica gäne tabe, cane piba weeme pana walya biname gäne. Yepä cane umle gäne tabe piiyepu teeme mene jättecijune. ⁵⁶Weeme kaakesaare Abrahamo gege ge, ingle tabe umle ge, egä tabe cebine cirege päpäna. Tabe näpänuji, siige mage gege äbituji.” ⁵⁷Israela biname cina jejisi egä, “Maane camu gäte fifti kämäge oomlana, maane piba cije lipu pi jiićenite, egä maane Abrahamo ne ituge päpäna?” ⁵⁸Yeesu jejemige egä, “Cane toraca jijenininine weebibine, egä cane uja ge, Abrahamo ingwe ca aplimluji.”

⁵⁹Puma cita ca Israela biname cina kula bine ewadimisi teebine äbyecrame, yepä Yeesu ämlitige, siige iiwäreja mete ne sebmaliige.

Yeesu Miiji Jewenige Ireçu Määsumäsu Biname ne

9 ¹Yeesu otni cabu ireçu määsumäsu biname ne jepänige, lui te pepu ärngeji ge. ²Abiberäja bägrä cina Yeesu ne itemlisi egä, “Abiberäja

biname, laati me niia mule name pi tabe apu gyene, teeme coo teeme mage babe bime?”³ Tabe jejemige egä, “Tabe irecu määsumäsu ärngeji lica gyene teeme niia mule ingle name pi coo teeme mage babe bime niia mule name pi. Tabe naace name pi irecu määsumäsu gyene egä Acejiyame me kokre ne teeme cabu ca päpäname.”⁴ Bimu apaclyera te liba enajenige, mine miiji teeme kaakesea wawena, cebine lui te nätyepuji. Ciiye te tädenige, piba nuuja te äblicäco kaakesea wawena.⁵ Cane liba gawecewe cabu säne, cane apaclyera gäne gawecewe tääpume.”

⁶ Ai mene ingwe gaabe ca Yeesu mote ne eclmutige gawe cabu me, gawe cama elengläcitige, siige pui ngate ne ecatige, teeme irecu bine aaganige.⁷ Piba tabe jejige egä, “Äte ädi, opo äcisäji Siloama cupicu cabu.” (Siloama me aboclomta lui ‘Ätyepäneji’.) Tabe ädige, opo äcisäjige, siige irecu aasatäneji tacnige.

⁸ Puma cita ca lui biname cina teeme gome icrajige, cuta lui cina teebine niinäce ituge päpänena ätinera je, teepi ätemläjini egä, “Nää, age sena pui biname, mine lui ne ätinera je jääpänanusi?”⁹ Poto cina jiicisi egä, “Yoo, tabe sine,” poto cina egä, “Eewe, tabe lica gyene, yepä teeme opo pui biname me pana gyene.” Yepä tabe pui biname te teemämu jiicige egä, “Cane age säne pui biname.”¹⁰ Teepi itemlisi egä, “Määme irecu cina lipulipu baasatäsi?”¹¹ Tabe jejemige egä, “Biname ngii Yeesu, tabe te mote ne elengläcitige gawe cama, siige pui ngate ca naganige cäme irecu, nätyepige Siloama cupicu cabu cane opo äcisejame. Cane liba ädine, siige jicisäjine, piba cäme irecu cina aasatäsi.”¹² Teepi teebine itemlisi egä, “Lese nyene tabe?” Tabe jejemige egä, “Cane umle lica gäne.”

Parisea Sigu Biname cina Itemläjisi Lui Irecu Määsumäsu Biname te Miiji Äbitige

¹³ Lui irecu määsumäsu biname te miiji bäbitige, teebine ecanisi Parisea sigu biname bime cabu me.¹⁴ Lui bimu cabu Yeesu gawe ne mote cama elengläcitige, siige teeme irecu bine miiji jaawenige, pui lui Sabade bimu ge.¹⁵ Puma cita ca Parisea sigu biname cina teebine itemlisi egä, “Määme irecu lipulipu miiji bäbitäsi?” Tabe jejemige egä, “Pui biname, tabe gawe ne teeme mote cama elengläcitige, pui ngate ca cäme irecu naganige. Cane opo äcisäjine, siige page cane gwidape bine jepänenemine.”¹⁶ Piba poto Parisea sigu biname cina apu jiicisi egä, “Lui biname te pepu mule ne jewenige, tabe äblicäco ge Acejiyame bau ca otni, ingle Sabade cotre ne jetropangtige.” Yepä poto cina jiicisi egä, “Lipu miiji gyene conocono biname te apu ciitaca mule bine waweneca?” Siige teepi yepä ngene atwana lica ge Yeesu poto cidi me.

¹⁷ Parisea sigu biname cina cuta cääri itemlisi pui biname ne egä, “Maane lipu ngene jotwaninite pui biname poto cidi me, meebine lui te

mijji naawenige?” Tabe jejemige egä, “Cane apu ngene jotwaninine, egä tabe lui Acejiyame me mename biname gyene.” ¹⁸Yepä Israela biname cina ätrunga lica ge, egä tabe irecu määsumäsu ärngeji ge, siige page jepänenemige, peei name pi teepi teeme mage babe bine ala taasoglicisi, ¹⁹äatemlisi egä, “Nää, ai lui weeme bägrä gyene? Lipu, tabe irecu määsumäsu ärngeji ge? Tabe page siige lipulipu jepänenemige?” ²⁰Mage babe cina jejemäsi egä, “Yoo, cine umle gegi egä tabe cime bägrä gyene, cuta irecu määsumäsu ärngeji ge, ²¹yepä cine nuuja umle lica gegi, tabe lipulipu irecu bii baasatige coo laati te mijji bii jewenige teebine. Weene teebine itemleye. Tabe baborage gyene weebibine daremu mene jajime.” ²²Teepi naace popi apu jicäsi, ingle teepi wälu ge Israela modamoda biname bime täapume. Israela biname cina apu ituge iicana, egä laati te jaawabudnituge Yeesu ne, egä tabe Keriso sine, Acejiyame lui ne cirege ätjepa biname bine niia cabu ca äsecreraame, piba pui biname ne yäyeblyngtusi teeme irecu ätumuta cabu ca. ²³Peei name pi teeme mage babe cina jicäsi egä, “Tabe baborage gyene. Teebine itemleye.”

²⁴Puma cita ca Parisea sigu biname cina cuta cääri ala tesoglicisi irecu määsumäsu ärngeji biname ne, jejisi egä, “Cine umle gemi, egä lui biname te meebine mijji naawenige, tabe conocono biname gyene. Maane lipu ngene jotwaninite teeme poto cidi me? Maane ngene gone näätrimaluge, egä Acejiyame te näätecijenige, peei name pi maane toraca mene nijini.” ²⁵Tabe jejemige egä, “Cane umle lica gäne, egä tabe conocono biname gyene coo liiyepu, yepä cane umle gäne, cane irecu määsumäsu ge niinäce, siige page jepänenemine.” ²⁶Puma cita ca Parisea sigu biname cina itemlisi egä, “Tabe ngena jewenige määme irecu cabu? Tabe lipulipu meebine irecu mijji naawenige?” ²⁷Tabe jejemige egä, “Cane uja bii jijinine, yepä weene lica bitecijinige. Weene ngena täapume singi gemi peei yepä gwidape täapume cääri ätecijaname? Pama weene singi gemi cuta teeme abiberäja bägrä me äbitame!” ²⁸Parisea biname cina teebine jisädisi, jejisi egä, “Maane peese näte teeme abiberäja bägrä. Cine Moose me abiberäja bägrä gemi. ²⁹Cine umle gemi, egä Acejiyamerage te Moose ne jejanuji, yepä cine peei biname poto cidi me umle lica gemi, egä tabe luma cita ca gyene.” ³⁰Pui biname te jejemige, “Tabe cäme irecu bii napatnige, yepä weene umle lica gemi, tabe laasi nyene. Cane cälu te nätige wemiji pi. ³¹Mine umle gemi, egä Acejiyame te conocono biname ne lica jättecijuge, yepä tabe eei biname ne jättecijuge, lui te teebine opo gaabe me yaacitanuge piyepu teeme singi ibibi jaawenimuge. ³²Agedna cabu ca ngälu page nuuja biname te lica ituge ätecija, egä biname te irecu määsumäsu ärngeji biname me irecu bine jaapatnige. ³³Acejiyame te peei biname ne liga lica cire täätyepeji, tabe ibibi lica gyene apu mule bine wawenecame.” ³⁴Parisea biname cina jejisi teebine egä, “Maane niiyarage biname gäte määme aplimla cabu ca ngälu page. Maane ngena

mijji gäte cibibine abiberäjame!” Siige teepi teebine teeme abasecretna mete cabu ca ijarisi.

Seemo Ireclota Ngalebora Lui Ireclu Määsumäsu Gemi

³⁵ Yeesu itecijige, egä tabe lui biname ne mijji jewenige, teebine sijarisi abasecretna mete cabu ca. Tabe liba teebine jepänige, tabe jejige egä, “Maane nää jitrungenite Acejiyame bau ca lui te täduji biname me äbituji?” ³⁶ Tabe pui biname te Yeesu ne jejige egä, “Babo biname, naji cebine, tabe laasi nyene, cane teebine piba jitrungenine?” ³⁷ Yeesu jejige egä, “Maane uja biiri jepänite teebine. Tabe page maane cama mene jicemenige.” ³⁸ Tabe Yeesu ne jejige egä, “Yageyame, cane näätrungenine meebine.” Piba tabe kokorare ca ääpednutige teeme opo gaabe je. ³⁹ Yeesu puma cita ca jicige egä, “Cane naace tääpume ai gawecewe cabu me itu tädujine biname bine atraname siige piba ireclu määsumäsu cina päpänename, cuta lui cina jääpänanemusi teepi ireclu määsumäsu me äbitame.” ⁴⁰ Poto Parisea sigu biname lui cina teta cama puga ge, itecijemige Yeesu ai mene iicema je, siige teepi teebine itemlisi egä, “Nää, maane apu naangeninige, egä cine cuta ireclu määsumäsu gemi?” ⁴¹ Yeesu jejemige egä, “Weene liba toraca ireclu määsumäsu lenaja je, piba nuuja te äblicäco weebibine niia mule poto cidi me aitneja; yepä weene jicenenemiye, egä weene cängena jepänenemiye, siige weebibine cirege atrana, ingle weeme niia mule piti nemi.”

Ngene ca Agli Mene Maamoi poto cidi me

10 ¹ Yeesu jicemige egä, “Cane toraca jijenininine weebibine, egä lui biname te maamoi caale bora me lica labacituge grana cabu, yepä tabe jaageluge caale nuuja poto ca, tabe lui eromaame birige piyepu cuta agliyame birige. ² Yepä lui biname te labacituge caale granarage cabu, tabe peese nyene maamoi ire atwi biname. ³ Teeme tääpume grana ire atwi biname te grana ne jiiitnuge, piyepu maamoi cina umle gemi teeme tagepogogo, siige tabe teemerage maamoi bine ngiirage ca jääjäcrimuge, caale cabu ca yäasemuge. ⁴ Tabe liba teebibine yäasemuge, tabe niinäce gaabe me läduge. Maamoi cina teebine ingwe yäacwusi, ingle teepi umle birige teeme tagepogogo. ⁵ Teepi idne biname ne ingwe lica yäacwusi. Teepi teeme bau ca luucratnuge, ingle teepi umle lica birige teeme tagepogogo.”

⁶ Yeesu teebibine ai ngene ca agli mene jejemige, yepä teepi opo lica ewatnisi, egä ngena tääpu myene.

Miijirage Maamoi Ire Atwi Biname

⁷ Yeesu cääri jicemige egä, “Cane toraca jijenininine weebibine, egä cane age säne grana maamoi bime tääpume. ⁸ Iyeta lui cina cäme niinäce

gaabe ca itu saaclepi, teepi lui eromaame gemi piyepu aglecayame gemi, yepä maamoi cina teebibine lica jäätecijemusi. ⁹Cane age säne grana. Laati te cäme cabu ca tabacituge, tabe ireclota ne jääpänuge. Tabe tabacituge caale ngalebora me, cuta lasatuge, siige tabe jääpänimuge baace loolo me. ¹⁰Eromaame te yepä täduge acatame, sabe wawename piyepu budre me aglime. Yepä cane te tädujine naace täapume egä maamoi cina toraca miijirage ireclota ne päpäname.

¹¹Cane age säne miijirage maamoi ire atwi biname, lui te teeme ireclota ne yäyemaluge maamoi name pi. ¹²Liba daremu cama biname te maamoi bine ire jaatwemuge, lui te toraca ire atwi biname lica birige piyepu lui me maamoi lica birige, tabe liba jääpänuge wulp ne otni je, tabe maamoi bine yaabmalimuge, luucruge. Puma cita ca wulp te maamoi bine jäängecreräjimuge, maamoi cina maramara yaaplidnärusi. ¹³Daremu cama lui ire atwi biname te luucruge, inge teeme toracarage ngenecu lica gyene maamoi bime täapume. ¹⁴Cane säne miijirage maamoi ire atwi biname. Cane umle gäne cäme maamoi, teepi umle gemi cane, ¹⁵epu pana Babe te lipu umle gyene cane, cane lipu umle gäne tabe. Cane cäme ireclota ne pa yäyemalepene maamoi name pi. ¹⁶Cäme piti nemi poto maamoi ai caale cabu lui lica gemi. Cane cuta miiji teebibine awecetnära, siige teepi cäme tagepogogo cire nätecijepesi. Siige yepä maamoi tomi cirege, cuta teeme täapume yepä ire atwi biname cirege.

¹⁷Babe te singi gyene cäme täapume, inge cane singi gäne cäme ireclota ne äyemelame naace täapume cuta cääri päpäname. ¹⁸Nuuja biname te lica pagege cebine teeme singi ca agli, yepä cane cämämu pagege cäme ireclota ceera budre täapume. Cäme conocäco pisi nyene cäme ireclota ceerame cuta cääri päpäname. Cäme Babe te apu ituge jaji cane wawename.”

¹⁹Yeesu me ai mene te Israela biname bine cuta cääri maramara ngene atwanena me jwenimige. ²⁰Teeme bucurage cina jiicisi egä, “Teeme niiya cable pisi nyene. Tabe buduma biname gyene. Weene teebine ngeno me jitecijiye?” ²¹Yepä poto cina jiicisi egä, “Niiya cable cama biname te äblicäco apu mene icema. Inge naace gyene, niiya cable cama biname te lipulipu irecu mäasumäsu biname bine jaawenimuge teepi päpänename.”

Israela Biname cina Yeesu ne Jigyisi

²²Padare te tatyaramtuge Yerusalema je iiwäreja mete ne ngene apecname. Pui lui gäbu padare ge. ²³Yeesu liba ädige Solomona me caagecage toro mete gawe cabu Acejiyame me iiwäreja mete caale bora je, ²⁴piba Israela biname cina teebine jewaclomtisi, jejisi egä, “Maane lipu lecaleca padare naanajinige cibibine jaji cäco, egä maane laasi näte? Nijini conocäco, maane liba Keriso säte, Acejiyame te lui ne ätyepame

tiicuji biname bine mäpu cabu ca äsecrera.”²⁵ Yeesu jejemige, “Cane uja ituge jaji weebibine, yepä weene lica itu nätrungepeye cebine. Cane lui ciitaca mule bine ituge waweneca cäme Babe me ngii cabu je, pui cina cebine naitnäjenisi.”²⁶ Yepä weene lica nätrungeniye cebine, ingle weene cäme maamoi lica gemi.”²⁷ Cäme maamoi cina cäme tagepogogo nätecijusi, siige cane umle gäne teepi. Teepi cäme ingwe poto ca saacluge.”²⁸ Nuuja te äblicäco teebibine cäme bau ca äsecrera, yepä cane teebibine iyeteta ireclota cire yääcäremepene, siige teepi budre ne lica cire jääpänepesi.”²⁹ Cäme Babe lui te ituge cebine ai maamoi ceera, tabe sine baborage. Nuuja te äblicäco gyene teebibine Babe me ime cabu ca äsecrera.”³⁰ Cine Babe cama yepä gegi.”

³¹ Piba Israela biname cina cuta cääri kula bine etomlicmisi Yeesu ne äbyecrame.”³² Yeesu teebibine jejemige egä, “Cane weeme opo gaabe bucurage miijimiji mule ituge waweneca, Babe te lui täapume ituge jaji. Lui mule name pi weene cebine kula ca äbyecrame naweniniye?”³³ Israela biname cina jejisi egä, “Cine mäame miiji mule name pi kula ca äbyecrame lica naaweninisi, yepä maane lipu Acejiyame me ngii ne sabe itu tewenumete. Maane binamerage gäte, yepä maane Acejiyame me äbitenite!”³⁴ Yeesu jejemige egä, “Weeme Cotre cabu oogäräneji gyene, egä Acejiyame te jiicuji, ‘Weene acejiyame gemi!’”³⁵ Mine umle gemi, egä Oogäräneji mene te ngena jiicenige, iyeteta toraca enajenige. Siige Acejiyame te liba acejiyame ca einemuji pui biname bine, Acejiyame me Mene lui bine ecäremujisi,”³⁶ cije weene piba ngena name pi najeniye cebine, Babe te lui ne teeme täapume mara me nawenuji, siige gawecewe cabu me nätyepuji, egä cane Acejiyame me ngii ne sabe jaawenune, teeme Bägrä ca liba lainune.”³⁷ Cane liba cäme Babe me kaakesea bine lica jaawenimune, piba weene gone cebine nätrunguye.”³⁸ Yepä cane liba jaawenimune, weene miiji cäme kaakesea poto cidi me ätrunga, ngänu gyene liba weene cebine lica nätrunguye. Piba weene umle läbitininuye, egä Babe te cäme cabu pisi nyene, cane Babe cabu pisi näne.”

³⁹ Israela biname cina cuta cääri äbitininisi Yeesu ne oomla-name, yepä tabe uucrige.

⁴⁰ Puma cita ca Yeesu cääri acnenutige Yoridana baduge nuuja poto doro me, pui puupu cabu me, Yoane luma niinäce biname bine niye ca jääcisäjemepi, siige tabe puga enajige.”⁴¹ Bucurage biname cina totninisi teeme bau me. Teepi jiicisi egä, “Yoane nuuja ciitaca mule ne lica itu jaawenepi, yepä tabe lui mene jiicemepi ai biname poto cidi me, toraca gyene.”⁴² Bucurage biname cina Yeesu ne puma jitrungisi.

Lajaro me Budre

11 ¹ Yepä biname ngii Lajaro pita cama ge. Tabe Betaniya cewe je enajige teeme neeneni ngule cama Maareta piyepu Mariya.

²Age tona pui Mariya, lui te miiji lengo oil ne yaapadurepi Yageyame me ernge cabu, siige teeme edingäli ca jääcisäjepi. Teeme wate Lajaro tage, lui te pita cama ge. ³Siige ngule cina mene jityepäsi Yeesu bau me egä, “Yageyame, määme mijirage biname te pita cama gyene.” ⁴Yeesu liba peei mene itecijige, tabe jiicige egä, “Ai pita te Lajaro ne budre me lica pa jaawenepi, yepä biname bine pa jaawenemepi Acejiyame me jamyacu apaclyera ne awepyeräjame. Piiyepu ai cabu ca Acejiyame me Bägrä me jamyacu apaclyera ne pa jääpänesi.” ⁵Yeesu babo singi ge Maareta teeme maade cama piyepu teeme wate Lajaro täapume.

⁶Yoo, Yeesu liba itecijige, egä Lajaro pita cama ge, tabe cäro camu puga enajige neeneni bimu cama. ⁷Puma cita ca tabe teeme abiberäja bägrä bine jejemige, “Biiri naclege Yuudea probins cabu me.” ⁸Teepi jejisi egä, “Abiberäja biname, cemacema Israela biname cina meebine kula ca puga liga nääbyecrinumesi budre me, nää maane cuta piyeme otnime äbitinite?” ⁹Yeesu jejemige egä, “Cije bimu me ngalebora twelb awa lica gemi kroke cabu ca ngälu mämleteca oomlaname? Laati te bimu apaclyera cabu läduge, tabe lica yaatramuge, ingle tabe ai gawecewe me apaclyera ne jääpänuge. ¹⁰Yepä ciye cabu laati te liba läduge, tabe yaatramuge, ingle teeme cabu nuuja apaclyera lica birige.” ¹¹Puma cita ca tabe abiberäja bägrä bine jejemige, “Mime biname Lajaro ute gyene, yepä cane ädenine teebine alotnentame.” ¹²Teepi jejisi egä, “Yageyame, tabe liba ute ogrenige, miiji äbitenige teeme pita cabu ca.” ¹³Yeesu ai mene Lajaro me budre poto cidi me jiicige, yepä abiberäja bägrä cina apu jengemige, egä papa ute me jiicige. ¹⁴Piba Yeesu pajecurage jejemige teebibine egä, “Lajaro budre gyene. ¹⁵Cane wemiji pi gege gäne, egä cane puga lica ge, tabe lui padare cabu budre täbitumi, ingle peei cabu ca weene umle päbitipeye cebine ätrungame. Biiri naclege teeme bau me!” ¹⁶Puma cita ca Tooma, ‘Päädepäde’ ca lui ne einenisi, nuuja abiberäja bägrä bine jejemige egä, “Yoo siige, mine biiri naclege iyeta Yeesu cama budre me.”

Yeesu Lui Ireclota Ceera Biname Gyene

¹⁷Yeesu liba Betaniya me atyaramtuge, tabe umle äbitige, egä Lajaro ne uja secitumesi, siige gape ngalebora fooa bimu cama senajumi.

¹⁸Betaniya lui trii kilomiita padare ge Yerusalema ca. ¹⁹Bucurage Israela biname cina itu tabasecretnumi Maareta Mariya naabi bau me sigita täapume teeme wate me budre name pi.

²⁰Maareta liba utecijige, egä Yeesu biiri tädenige, tabe oclige teebine awacletnäjame, yepä Mariya mete cabu je onajige. ²¹Maareta liba Yeesu ne jepänige, tabe jejige egä, “Yageyame, maane liga ama cirege, cäme wate te budre lica cire läbiteji. ²²Yoo, tabe puu budre gyene, yepä cane umle gäne, egä Acejiyame te nääcärenige, maane ngeno me

jejenite.” ²³ Yeesu Maareta ne jojige, “Määme wate te budre cabu ca alotnantenige ireclota me.” ²⁴ Tabe jejige egä, “Yoo, cane umle gäne, egä ceräcerägäabu bimu cabu iyeta biname cina liba budre cabu ca ireclota me cire larpinäripesi, tabe cuta piba cirege arpinenta.” ²⁵ Yeesu jojige egä, “Cane age säne budre cabu ca lui te biname bine cirege arpinera piyepu ireclota ceera. Laati te cebine nätrunguge, ngänuge tabe puu budre gyene, yepä tabe ireclota gyene. ²⁶ Piyepu laati te ai ireclota cabu nätrunguge cebine, tabe iyeteta budre ne lica jääpänuge. Nää, maane cäme mene nätrungenite?” ²⁷ Tabe jejige egä, “Yoo Yageyame, cane näätrungenine, egä maane Keriso säte, Acejiyame lui ne itu näätyepuji biname bine äsecrerame mäpu cabu ca. Maane lui Acejiyame me Bägrä gäte, lui ne jewagrijenisi otnime.”

Yeesu Ele Engenige

²⁸ Puma cita ca Maareta Yeesu ne ebmalige, acnenutige cewe me, teeme igane Mariya ne ogä jojige egä, “Abiberäja biname te bii tädige, tabe määme täapume nätemlige cebine.” ²⁹ Mariya liba utecijige, tabe watatarage mete cabu ca asatige, oclige teebine päpäname. ³⁰ Yeesu cäro camu ge cewe ngalebora me abacita, yepä tabe camu puga ge Maareta luma teebine niinäce edärige. ³¹ Sigita me lui Israela biname cina seclumi, teepi liba jopänisi Mariya ne abujengta je watatarage asata je, siige teepi teebine ingwe ucwisi, ingle teepi apu jengemige, egä tabe gape cabu me oclenige ele me.

³² Mariya liba pui puupu cabu me atyaramtige, Yeesu luma enajige, siige teebine liba jepänige puma, tabe teeme opo gaabe je utramige, jejige egä, “Yageyame, maane ama liga cirege, cäme wate te budre lica cire läbiteji.” ³³ Yeesu liba jopänige teebine ele angena je cuta liba jepänimige teta cama lui Israela biname cina seclige ele angenetna je, tabe ngenecu mäpu me äbitige. ³⁴ Tabe itemli-mige egä, “Weene teebine luma secitumeye?” Teepi jejisi egä, “Yageyame, maane tädi ire me.” ³⁵ Puma cita ca Yeesu ele enge-nige. ³⁶ Israela biname cina jiiçisi egä, “Jepäneye, tabe lipu baborage singi ge teeme täapume!” ³⁷ Yepä poto cina jiiçisi egä, “Tabe irecu määsumäsu biname ne miiji jaawenepi. Tabe ama liga cirege, tabe pama Lajaro me budre gaabe ne cuta cire yaarmeji.”

Yeesu Lajaro ne Budre cabu ca Erpinantige

³⁸ Yeesu cääri ngenecu mäpu me äbitige, siige ädige gape gome me. Pui gape lui kula bora uureji ge. Grana kula ca armeji ge. ³⁹ Yeesu biname bine jejemige kula ne apetrengtame. Puma cita ca budre biname me ngule Maareta te jejige egä, “Yageyame gone, tabe niyarage lengo cama gyene, ingle foom bimu cama gape bora senajumi!” ⁴⁰ Yeesu jojige, “Egäsu nata cane naajine meebine, egä maane liba ätrunga cama gäte,

maane Acejiyame me kokre ne jepänenite.”⁴¹ Puma cita ca teepi kula ne epeträngtisi. Yeesu piba cabu me ire acitige, jiicige egä, “Babe, cane eso nääcärenine, egä maane cebine nätecijenite. ⁴²Cane umle gäne, egä maane iyeta padare cabu cebine nätecijanute, yepä cane ai mene biname bime name pi jicenine piba teepi ätrungame, egä maane te cebine itu nätyepujite.”⁴³ Ai mene iicana ingwe gaabe ca tabe baborage tagepogogo ca ala abayige egä, “Lajaro, tasati peema cita ca!”⁴⁴ Siige tabe tasatige gape cabu ca, teeme ime ernge cäbletääpe ca tope atneji ge piyepu opo cäbletääpe ca acwabäneji ge. Yeesu piba biname bine jejemige, “Jiibiremeye, siige lädege tabe.”

Gläamu Jecijemige Yeesu ne Aglime

(*Matayo 26:1-5; Mareko 14:1-2; Luuka 22:1-2*)

⁴⁵ Mariya bau me lui Israela biname cina sigita me saaclepi, teepi jepänisi Yeesu ngena mule ne jewenige, siige teeme bucurage cina jitrungisi teebine. ⁴⁶Yepä teeme nesae cina äcnäriige Parisea sigu biname bime bau me, teebibine jejemisi, Yeesu ngena mule ne jewenige. ⁴⁷Puma cita ca Parisea sigu biname piyepu modamoda iiwäreja biname cina, teepi iyeta mutre biname bine ala tesoglicmisi mene atraname, siige jejemisi egä, “Mine ngena ne jewenenisi? Ai biname te bucurage ciitaca mule bine jewenetnäjennemige. ⁴⁸Mine liba ire taatu jecitenisi tabe apu mule wawenecame, piba iyeta biname cina teebine jitrungenisi, siige teeme bau me eclenige. Piba Rooma cubu biname cina pa saaclepi iiwäreja mete ne sabe wawename piyepu cuta iyeta biname bine sabe wawename, ingle Rooma gabmani^b te singi lica gyene nuuja biname te mope me äbitame.”

⁴⁹Teeme yepä te ngii Kayapa, lui tage iiwäreja mope biname pui padare cabu, jejemige egä, “Weene lipu buduma gemi! ⁵⁰Nää, weene umle lica gemi, egä yepä biname te miiji budre äbita iyeta biname bime täöpume, lica iyeta biname cina?”⁵¹ Ai lui teeme ngene atwanena mene lica ge. Yepä pui padare cabu tabe tage iiwäreja mope biname, siige Acejiyame te piba ngene atwanena ecäriige, egä Yeesu te miiji budre äbita iyeta Israela biname bime täöpume. ⁵²Cuta tabe teeme taatu täöpume lica budre yepä iyeta Acejiyame me bägräwale bime täöpume, lui cina aplidnäreji gemi ai gawecewe cabu iyeta poto ta, naace name pi teebibine yepä gome me abasecretname. ⁵³Pui padare cabu ca Israela mutre biname cina gläamu jecijemige Yeesu ne budre me acitame. ⁵⁴Peei ingwe gaabe ca Yeesu cabucabu lica otnetnäjiige Yuudea probins cabu. Tabu pui gawe ne piba sebmaliige, ädige yepä cewe me ngii Eperema, lui daapo taatu cewe gome jage. Tabu puga teeme abiberäja bägrä cama enajige.

^b 11:48 Rooma gabmani: Rooma gabmani te Yeesu me padare cabu Israela gawe ne eceananige.

⁵⁵Israela biname bime äsuplengta trii mameta ge, siige bucurage biname cina abasecretlige cewe maramara cabu ca Yerusalema me. Trii padare camuge, teepi niinäce eclige naace täápume cude gwidape cabu ca kälyä äbitame piba ingwe ca trii cabu me äbäcname. ⁵⁶Teepi puma Yeesu ne jirngisi, siige iiwäreja mete cabu ätemläjinisi egä, “Weene lipu ngene jotwanininiye, nää tabe pama tädenige ai trii padare täápume coo lica?” ⁵⁷Modamoda iiwäreja biname piyepu Parisea sigu biname cina jicisi egä, “Laati te liba päpäna je, egä tabe luma enajenige, pui biname te miiji cibibine umle wawenname, cine piba teebine oomlana.”

Mariya te Yeesu ne Oil ca Eganige Betaniya Cewe je
(*Matayo 26:6-13; Mareko 14:3-9*)

12 ¹Piiyeme siks bimu ge äsuplengta trii padare oomlaname, Yeesu piba Betaniya cewe me ädige, Lajaro luma senajenäjumi, tabe lui ne budre cabu ca yaarpenantepi. ²Yeesu ne deedei puga ecärisi. Lajaro pui bime yepä ge, lui cina teta cama deedei äbitininisi. Maareta mogobi jewenimige. ³Piba Mariya ecatige miiji lengo camlecample nardus oil karpu ne, babo daremu ca lui oil ne jaaletnusi, epadurige Yeesu me ernge cabu, piba edingäli ca jicisäjige. Miijirage lengo te mete ne iyeta joomlige.

⁴Yeesu me yepä abiberäja bägrä ngii Yuuda Isakariyota, lui te teebine pagege budre me awaba, tabe Yeesu ne jejige egä, ⁵“Ngena name pi mine ai oil ne acata cäco aletname trii hanred silba rarekaake ca, siige pui rarekaake owecumete biname bine ceerame?” ⁶Tabe ai mene naace name pi lica jicige, egä tabe owecumete biname bime täápume owecu ge, yepä tabe naace popi jicige, ingle tabe eromaame ge. Tabe te teeme iyeta bime rarekaake ire jaatwemuge, siige peema cita ca yaawadimuge rarekaake bine teeme singi gaabe wawenetnäjame. ⁷Yeesu Yuuda ne jejige egä, “Obmali teebine. Tabe ewetnenige teeme lui oil cebo pisi nyene cebine gape cabu acita bimu täápume. ⁸Owecumete biname cina weene cama iyeteta pa yaacrajepi, yepä cane weene cama iyeteta lica pagege lenaja.”

Mene Jewenisi Lajaro ne Aglime Budre me

⁹Bucurage Israela biname cina itecijemige, egä Yeesu Betaniya sine. Puma cita ca teepi eclige Betaniya cewe me lica Yeesu taatu name pi, yepä teepi cuta singi Lajaro ne päpäname, Yeesu lui ne budre cabu ca itu yaarpinantepi. ¹⁰Siige modamoda iiwäreja biname cina gläümü jicrajige Lajaro ne cuta budre me aglime, ¹¹ingle temiji pi bucurage Israela biname cina Yeesu me poto cidi me äbitininisi, teebine jitrungisi.

Yeesu Yerusalema me Abacitige

¹²Nuuja bimu cabu äsuplengta trii täápume lui biname cina itu tabasecretnumi, teepi itecijemige, egä Yeesu biiri tädenige Yerusalema

me. ¹³Teepi uli ciipe bine icnapimisi, eclige teebine awacletnäjame. Teepi baborage tagepogogo ca abayininisi egä,

“Acejiyame ne yaawepyeräjesi!

Yageyame me ngii cabu lui te tädenite, tabe miiji naawenege meebine!

Acejiyame te Israela mope biname ne miiji naawenege!”

¹⁴Yeesu mamye dongki ne jepänige, siige acenutige teeme papa cabu me. Apu ibibi äbitige Oogäräneji mene, lui te jiicenige egä,

¹⁵“Babo cewe lui Siiyona podo cabu, maane wälu gone!

Määme mope biname te aga tädenige mamye dongki papa cabu.”

¹⁶Pui padare cabu abiberäja bägrä cina ai mule ne opo lica ewatnujisi, yepä Acejiyame te liba Yeesu ne budre cabu ca erpinan-tuji, teepi piba ngene jotwinujisi, egä apu oogäräneji gyene teeme poto cidi me, cuta teepi apu ituge wawena teeme täöpume.

¹⁷Lui biname cina jääpänepesi Yeesu lipu Lajaro ne gape cabu ca ala taasoglecepi, siige budre cabu ca yaarpinantepi ireclota me, teepi biname bine umle jaawenanemepesi. ¹⁸Siige biname cina seclige Yeesu ne awacletnäjame, ingle teepi peei ciitaca mule poto cidi me ituge ätecija.

¹⁹Puma cita ca Parisea sigu biname cina teemeteme ajananinisi egä, “Jepäneye! Mine äblicäco gemi nuuja mule ne wawena! Iyeta biname cina teebine ingwe icwenisi!”

Poto Griik Biname cina Yeesu ne Jirngisi

²⁰Poto Griik biname cina cuta puga ge pui biname bime sobe cabu, lui cina Yerusalema me seclumi äsuplengta trii padare cabu Acejiyame ne awejename. ²¹Teepi Pilipo bau me seclige. Tabe lui Betesaida cewe biname ge, lui cewe Galilaya probins ngalebora jage. Teepi Pilipo ne jejisi egä, “Babo biname, cine singi gemi Yeesu ne päpäname.” ²²Puma cita ca Pilipo ädige, Andrea ne jejige, siige teepi gigri aaclige Yeesu ne umle wawename. ²³Yeesu teebibine jaajige egä, “Padare te bii tatyaramtuge Acejiyame te awabudni-tame, egä teeme bau ca lui te täduji biname me äbituji, tabe lipu jamyacu apacljera cama gyene. ²⁴Cane toracarage jijenine weebibine: wiiti kuu te liba gawe cabu me lica yaatramuge, siige budre liba lica läbituge, teeme cabu ca äblicäco nuuja gwidape te agi. Yepä liba budre läbituge, siige bucurage kuu cina täpletnäruge. ²⁵Laati te teeme ireclota täöpume singi yaanajuge, tabe teeme ireclota ne yaapesaruge. Yepä laati te liba teeme ireclota täöpume singi lica birige ai gawecewe cabu, tabe teeme ireclota ne yaamacetnäjuge iyeteta ireclota täöpume. ²⁶Laati te liba singi căme kaakesea wawename, tabe cane cama tädenige naace name pi egä căme kaakesea bägrä te emä lenajame cane luma. Căme Babe te eei ne opo gaabe me yaacituge, lui te căme kaakesea ne jaawenuge.”

Yeesu Teeme Budre poto cidi me Jiicenige

²⁷“Page căme ngenecu măpu gyene, siige cane miiji ngena iicaname! Năă, cane apu irecu lătumutene egă, ‘Babe, lui măpu te tădenige căme niinăce gaabe me, maane iyebtingtepi.’ Eewe, cane äblicăco pepu irecu ätumuta, ingle cane aima tădujine ai măpu cabu cewe oocaname.

²⁸Babe, määme ngii me jamyacu apaclyera ne seboclomtepi!” Puma cita ca tagepogogo te cabucewe ca tädige egă, “Cane căme ngii me jamyacu apaclyera ne ituge aboclomta, cuta cane pagege cääri aboclomta!”

²⁹Lui biname cina puma aclajuteji icrajige, teepi liba ai tagepogogo itecijemige, teepi jiicisi egă, “Maadubi ala ge pama,” yepä poto cina jiicisi egă, “Acejiyame me mename seemo te mene tejige teebine.” ³⁰Yeesu puma cita ca teebibine jejemige egă, “Ai tagepogogo te lica tädige căme name pi, yepä weeme name pi. ³¹Siige page padare gyene ai gawecewe ne atraname. Ai gawecewe ne lui te ecanenige, teebine iyebtingtenisi page. ³²Cebine liba gawe cabu ca atecwenta cabu me, cane iyeta biname bine pa saawademepene căme bau me.” ³³Ai mene iicema ca tabe eboclomtigi, tabe lipulipu gaabe cabu budre pa läbitepi.

³⁴Puma cita ca biname cina jejisi teebine egă, “Mime Cotre te nijenininige, egă Keriso, biname bine măpu cabu ca lui te cirege äsecrera, tabe iyeteta lenaja myene. Maane cije piba lipulipu jiicite, egă Acejiyame bau ca lui te otni biname me äbitame, teebine miiji cabu me atecwenta? Laasi nyene ai, lui te Acejiyame bau ca cirege otni biname me äbitame?” ³⁵Yeesu jejemige egă, “Apaclyera te cerămu matikolä padare weene cama pa yaanajepi. Weene otni-neye, apaclyera liba taatu camu pisi nyene weene cama, cije krokeciye te itrugärinuge weebibine. Krokeciye cabu lui te waatnuge, tabe umle lica gyene liiyeme otni. ³⁶Weene ätrunga eciteye apaclyera cabu me, tabe liba pisi nyene weene cama, piba weene apaclyera cama biname birige.”

Israela Biname cina Ätrunga căco Gemi

Ai mene ingwe gaabe ca Yeesu piba ädige, ämlitige biname bime bau ca. ³⁷Yeesu puu bucurage ciitaca mule bine ituge waweneca Israela biname bime irewale je, yepä teepi lica jitrungisi teebine ³⁸naace tääpume Acejiyame me mename biname Isaya me mene te toraca me äbitame egă,

“Yageyame, biname cina ätrunga căco ituge cime mene poto cidi me, piiyepu teepi umle căco määme kokre.”

³⁹Teepi naace popi äblicăco ge ätrungame, ingle Isaya cuta itu jiicuji egă,

⁴⁰“Acejiyame te teeme irecu bine iredärime me jewenimuji, egă teepi cije cängena jääpänusi.

Tabe teebibine mopemuli căco me jewenemuji,

egä teepi cije umle läbitininusi,
piyepu cuta tatatrongäruge căme bau me lui Acejiyame găne
naace name pi egă cane teebibine miiji wawename.”

⁴¹Isaya ai mene jiicuji, ingle tabe niinäce gaabe me Yeesu me kokre ne jepănuji, peei name pi tabe teeme poto cidi me apu jiicuji.

⁴²Ngănuge puu iyeta ai mule cina äpletnera, yepă cuta bucurage modamoda Israela biname cina Yeesu ne jitrungisi. Yepă Parisea sigu biname bime wălu name pi teepi cabucabu lica jitrungisi, cije teebibine äyebngăja mage teeme irecu ätumuta cabu ca. ⁴³Teepi singi biname cina teeme täápume miijirage ngene atwana cama lenajame, yepă lica Acejiyame te.

Yeesu Mene Jiicige Atrana poto cidi me

⁴⁴Yeesu baborage tagepogogo ca jiicemige egă, “Laati te nätrunguge cebine, tabe cebine taatu lica nätrunguge, yepă cuta teebine jäätrunguge, cebine lui te nätyepuji. ⁴⁵Laati te cebine năpănuge, tabe cuta jääpănuge eei ne, cebine lui te nätyepuji. ⁴⁶Cane tädujine ai gawecewe cabu biname bine apacljera täápume, egă iyeta lui cina cebine nätrungusi, teepi krokeciye cabu lica page yaacrajemepi. ⁴⁷Laati te yäätəcijuge căme mene, yepă lica yaacatuge, cane teeme atrana biname lica găne, ingle cane lica itu tädujine aima biname bine atraname yepă niiya cabu ca äsecerame. ⁴⁸Atrana pisi nyene pui biname täápume, lui te cebine nägyuge piyepu căme mene jäägyemuge. Cane lui mene bine ituge iicema, pui cina teebine cirege atrana. ⁴⁹Cane cămerage ngii cabu lica ituge iicema, yepă Babe lui te cebine nätyepuji, tabe te ituge ajanena cane ngena jajanename piyepu iicemame. ⁵⁰Cuta cane umle găne, egă Acejiyame lui mene jiicemimuge, iyeteta ireclota yäăcărănemuge biname bine pui mene te. Yoo siige, cane jiicemimune, Babe te ngena ituge jajanena cebine.”

Yeesu Teeme Abiberăja Băgră bime Ernge Jicisăjemige

13 ¹Äsuplengta trii liba nuuja bimu ge, Yeesu tabe umle ge, egă teeme padare te bii tatyaramtuge ai gawecewe ne abmalame siige Babe bau me acnenutame. Tabe iyeta padare singi ituge pui bime täápume, ai gawecewe cabu lui teemi nemi. Teeme budre te liba mameta me täbitige, tabe lica teebibine jigymige, yepă tabe singi ge teeme täápume ngălu ngălugaabe oomlaname.

²Yeesu teeme abiberăja băgră cama liba deedei cabu jage, Satani te uja ngene atwana ecăruji Yuuda ne, lui Simona Isakariyota me băgră ge, tabe Yeesu ne awabame budre me aglime. ³Yeesu umle ge, egă Babe te iyeta kokre teebine ituge ceera. Tabe cuta umle ge, egă tabe Acejiyame bau ca itu täduji cuta teeme bau me acnenutenige. ⁴Siige tabe abujängtige deedei loolo

dade cabu ca, teeme cäbletääpe ne iyebblingtige, taweli ca amlemaltige ibi cabu. ⁵Piba tabe niye ne disi cabu epadurige, siige gije abacitige abiberäja bägrä bine ernge äcisejame. Liba yepä ne jääcisäjuge, pui taweli ca cuta nebo jääcisäjuge, lui te teeme ibi cabu amlemalteji ge. ⁶Tabe liba Simona Peteru gome tädige teeme ernge äcisejame, Peteru jejige egä, “Yageyame, nää maane te äbitenite cäme ernge äcisejame?” ⁷Yeesu jejige egä, “Maane page umle lica gäte, cane ai lui ngena ne jewenenine, yepä maane ingwe ca umle pagege äbita.” ⁸Peteru jejige egä, “Eewe, pipu padare te lica tädenige egä maane cäme ernge äcisejame!” Yeesu jejige egä, “Cane liba mäame ernge lica nääcisäjene, maane piba cäme abiberäja bägrä lica gäte.” ⁹Simona Peteru te jejige egä, “Yageyame, piba cäme ernge taatu gone näcisäjute, yepä ime piyepu mope cama näcisäjepi!” ¹⁰Yeesu jejige egä, “Laati te liba gooni loowanguge, tabe nuuja gwidape täapume singi lica, yepä tabe ernge taatu jääcisäjuge, siige tabe piba jugi cäco birige. Weene jugi cäco gemi, yepä weeme iyeta cina lica.” ¹¹Yeesu umle ge, egä laati te teebine budre me pa jaawabepi, peei name pi tabe jiicige, egä teepi iyeta jugi cäco lica gemi.

¹²Yeesu liba apirige abiberäja bägrä bine ernge äciseja ca, tabe teeme cäbletääpe asigrige, acnenutige teeme puupu cabu me adnatame, piba abiberäja bägrä bine itemlimige egä, “Weene nää umle bäbitininiye, cane ngena bii jewenine weeme täapume?” ¹³Weene naininiye Abiberäja biname ca piyepu Yageyame ca. Weene peei lui toraca mene jiiceniye, ingle cane pipu gäne. ¹⁴Siige liba cane, weeme Yageyame piyepu Abiberäja biname te weeme ernge bii jicisäjemine, weene cuta miiji pepu weemeweme ernge äcisejana. ¹⁵Cane ai ne naace täapume bii jewenine weene cebine ätutename. ¹⁶Cane toraca jijenininine, egä kaakesea bägrä te lica birige baborage teeme babo biname bau ca, cuta mename biname te babo lica birige teeme bau ca, teebine lui te jäätyepuge. ¹⁷Weene aga umle bäbitininiye ai mule poto cidi me, siige lipu gege gemi weene, liba apu läbitininuye.

¹⁸Cane weeme iyeta poto cidi me ai mene lica jiicenine, ingle cane umle gäne weene lipu biname gemi, cane lui bine ituge äjäcra. Oogäräneji mene te lipu jiicenige egä, ‘Lui te cane cama deedei äbitenige, tabe cebine pa näcisärmutepi,’ ai mene te miiji toraca me äbitame. ¹⁹Cane ai mene naace name pi niinäce gaabe me jijenininine weebibine, egä ai mule te liba pa läbitepi weene piba ätrungame, egä cane pui biname gäne, lui täapume cane jijanininune weebibine. ²⁰Cane toraca jijenininine, egä laati te yaacatuge, cane lui ne jäätyepune, tabe cebine nacatuge. Piyepu laati te cebine nacatuge, tabe cuta teebine yaacatuge, cebine lui te nätyepuji.”

Yeesu piyepu Yuuda

(*Matayo 26:20-25; Mareko 14:17-21; Luuka 22:21-23*)

²¹Ai mene iicema ingwe gaabe ca Yeesu mage ngenecu mäpu me äbitige, pajecurage jiicige egä, “Cane toraca jijenininine weebibine, egä

weeme yepä te page nawabenige cebine budre täápume!”²² Abiberäja bägrä cina teemeteme ire atwananinisi umle cäco, egä tabe laati poto cidi me jiiçige ai mene.

²³ Abiberäja bägrä bime yepä te, Yeesu lui täápume babo singi, tabe teeme gome adnatäneji ge. ²⁴ Simona Peteru teebine irecu cubu ca jewenige Yeesu ne ätemlame, egä tabe laati poto cidi me jiiçige peei mene. ²⁵ Siige pui abiberäja bägrä te äbyenutige Yeesu bau me, itemlige egä, “Yageyame, maane laati täápume jiiçite peei mene?” ²⁶ Yeesu teebine jejige egä, “Cane liba buluduu pacu ne yiiglenutenine jurä cabu me, siige liba laati ne ecärenine, peese nyene pui biname.” Siige tabe buluduu pacu ne ecatige, yiiglenutige, ecäriige Yuuda ne, lui Simona Isakariyota me bägrä ge. ²⁷ Liba Yuuda buluduu ne juutecrige, piba taatu Satani te abacitige teeme trupa cabu me. Yeesu Yuuda ne jejige egä, “Maane ngena wawena mäte singi, watawata jeweni.” ²⁸ Nuuja abiberäja bägrä cina nuuja umle lica ge, egä Yeesu ngena täápume teebine apu jejige. ²⁹ Ingle Yuuda lui teeme rarekaake ire atwi biname ge, poto abiberäja bägrä cina apu jengemige, egä Yeesu teebine jejige ai soriyomu täápume gwidape aletname coo owecumete biname bine rarekaake ceerame. ³⁰ Siige Yuuda liba buluduu pacu juutecrige, tabe piba taatu asatige. Pui lui ciiye ge.

Kirece Cotre

³¹ Yuuda liba asatige, Yeesu piba abiberäja bägrä bine jejemige egä, “Siige Acejiyame bau ca lui te täduji biname me äbituji, teeme jamyacu apaclyera ne page jepänenisi, cuta Acejiyame me jamyacu apaclyera ne jepänenisi teeme cabu ca. ³² Siige Acejiyame me jamyacu apaclyera ne liba jepänenisi teeme cabu ca, piba Acejiyame te teeme Acejiyamerage cabu ca pajecu me jewenenige pui me jamyacu apaclyera ne, teeme bau ca lui te täduji biname me äbituji. Tabe peei ne watatarage jewenenige. ³³ Cäme miiçirage bägräwale, cane matikäli padare taatu cerämu nanajinige weene cama. Weene cebine pa närngepeye, yepä cane peei yepä mene jijenininine weebibine, cane lipu Israela biname bine ituge jaji, egä cane liiyeme ädenine, weene peeyeme äblicäco gemi otni. ³⁴ Cane weebibine kirece cotre icärininine: weene miiçi weemeweme singi äbitena. Cane lipu weeme täápume singi ituge, weene cuta miiçi pepu weemeweme singi äbitena. ³⁵ Weene liba weemeweme singi läbitaninuye, pui cabu ca biname cina umle birige, egä weene cäme abiberäja bägrä gemi.”

Yeesu piiyepu Peteru

(Matayo 26:31-35; Mareko 14:27-31; Luuka 22:31-34)

³⁶ Simona Peteru te Yeesu ne itemlige egä, “Yageyame, maane liiyeme ädenite?” Yeesu jejige egä, “Page maane äblicäco gäte cane cama otni,

cane liiyeme ädenine, yepä maane ingwe ca cire tädepi.”³⁷ Peteru jejige egä, “Yageyame, ngena name pi cane äblicäco gäne page maane cama otnime? Cane bamaceträjine mämiji pi budre äbitame.”³⁸ Yeesu jejige egä, “Maane nää toraca bamaceträjite cämiji pi budre äbitame? Cane toraca mene naajenine, airage ciye cabu maane niinäce cebine nesae gaäbu nainenite, paulo te ingwe ca ala piba sengenenige.”

Yeesu Gaabe Gyene Babe bau me

14¹ “Weene ngenecu mäpu gone! Acejiyame ne jitrungeye cuta cebine nätrungeye.² Cäme Babe me mete cabu bucurage puupu piti nemi, siige cane ädenine weeme tääpume amaceträjame. Puupu liga lica cirege, cane piba weebibine apu lica cire jijinejine.³ Cane puu niinäce ädenine weeme tääpume puupu ne amaceträjame, cane cuta cire tacnepene weebibine arwojame cäme bau me. Weene puma cire inajipi, cane luma.⁴ Weene umle gemi gaabe, pui puupu cabu me lui gaabe te ädenige, cane luma pagege lenaja.”

⁵ Tooma Yeesu ne jejige, “Yageyame, cine umle lica gemi, maane liiyeme ädenite, cine piba lipulipu pagege umle äbita gaabe piyeme otnime?”⁶ Yeesu Tooma ne jejige egä, “Cane age säne gaabe, cane age säne toraca, cane age säne ireclota. Nuuja gaabe lica gyene Babe bau me otni me, yepä cane säne gaabe.⁷ Weene liba toraca umle cirege cane, weene piba cuta umle cirege Babe. Siige page ama cita ca weene umle gemi tabe; weene ituge teebine päpäna.”

⁸ Pilipo Yeesu ne jejige, “Yageyame, Babe niwabini cibibine! Cine peei taatu memi singi.”⁹ Yeesu teebine jejige egä, “Pilipo, maane nää toraca umle cäco gäte cane, ngänuge cane puu lecaleca padare weene cama itu nanajenanumi. Laati te liba cebine näpänuge, tabe cuta Babe ne jääpänuge, peei name pi maane lipulipu jicite egä, ‘Babe niwabini cibibine.’¹⁰ Maane nää ätrunga lica gäte, egä cane pisi näne Babe cabu, Babe pisi nyene cäme cabu. Cane cäme ngene atwana mene lica jicemimune, yepä Babe te cäme cabu sine, siige cäme cabu ca kaakesea jewenenige.¹¹ Weene miiji ätrunga, egä cane Babe cabu säne, Babe cäme cabu sine. Weene liba nuuja ingle name pi lica birige ätrunga, weene miiji cäme kaakesea miiji pi ätrunga.¹² Cane toraca jijenininine weebibine, egä laati te cebine nätrungeye, tabe epu mule bine jaawenimuge cane liiyepu. Cuta cerämu poto jaawenimuge, ingle cane Babe bau me ädenine.¹³ Iyeta weene lui tääpume yäätelmye cäme ngii cabu, cane jaawenune weeme tääpume naace name pi biname cina piba Bägrä cabu ca päpäname Babe me jamyacu apacyera ne.¹⁴ Weene liba ngena tääpume yäätelmye cäme ngii cabu, cane icärininune.”

Yeesu Abiberäja Bägrä bine Jejemige Aceji Seemo ne Ätyepame

¹⁵ “Weene liba singi cäme tääpume, weene cäme mene ibi jaawenimuye.¹⁶ Cane Babe ne itemlenine, tabe te nuuja Ätityerayame

pa sicäripi weebibine. Pui te weene cama iyeteta pa yaanajepi. Tabe lui Seemo gyene, lui te saaboclomtuge, ngena gyene toraca. ¹⁷Ätrunga cäco biname cina äblicäco teebine acata, ingle teepi äblicäco teebine päpäna coo teeme poto cidi me umle äbita. Yepä weene umle gemi tabe, ingle tabe weene cama enajenige piyepu tabe weeme cabu pagege lenaja.

¹⁸Cane weebibine taatu lica pa sibmalipene, yepä cane cuta pa tacnenutepene weeme bau me. ¹⁹Matikäli padare ingwe gaabe ca ätrunga cäco biname cina cebine lica pa näpänepesi, yepä weene pa näpänepeye. Ingle naace popi cane ireclota nanajinige, weene cuta ireclota pinajipi. ²⁰Pui bimu cabu weene umle page äbitipeye, egä cane Babe cabu säne, weene cäme cabu temi, cane weeme cabu säne.

²¹Laati te cäme mene ne yaacatuge, siige yäacwetnuge, tabe peese nyene biname, lui te cäme täapume singi. Laati te cäme täapume singi, cäme Babe te teeme täapume singi birige. Cane cuta singi gäne teeme täapume, siige teeme bau me pa laboclomtene.” ²²Yuuda, lica Isakariyota me bägrä yepä nuuja Yuuda, tabe Yeesu ne jejige egä, “Yageyame, pei lipu gyene, egä maane cime bau me pa taboclomtapi, lica ätrunga cäco biname bime bau me?” ²³Yeesu Yuuda ne jejige, “Laati te liba cäme täapume singi, tabe cäme abiberäja mene bine yäacwetnimuge. Cäme Babe te teeme täapume singi, siige cine cäme Babe cama pa niclepi teeme bau me teeme cabu lenajame. ²⁴Yepä laati te liba cäme täapume singi lica, tabe cäme abiberäja mene bine lica yäacwetnimuge. Weene lui abiberäja mene bine ituge ätecija, cäme lica gemi, yepä cäme Babe memi, lui te cebine nätyepuji.

²⁵Cane ai mene bii jijanininine weebibine, page cane liba weene cama camu pisi näne. ²⁶Yepä Aceji Seemo, Acejiyame te lui ne cäme ngii cabu pagege ätyepa weebibine ätityeraname, tabe te iyeta mule poto cidi me pa sibiberäjipi piyepu cääri umle pa tiwenanipi, cane ngena poto cidi me itu jijaninipene.

²⁷Cane poode ne sebmalenine weeme bau me. Cane cämerage poode icärininine weebibine, pei name pi ngenecu mäpu gone, wälu gone! Pepu pana poode ne weene äblicäco päpäna ai gawecewe cabu ca. ²⁸Weene bii nätecijye cane iicana je egä, ‘Cane weebibine page sibmalipene, cuta page tacnenutepene weeme bau me.’ Weene liba cäme täapume toraca singi gemi, weene gege gemi, egä cane Babe bau me ädenine, ingle tabe baborage gyene cäme bau ca. ²⁹Cane aga niinäce gaabe me iyeta bii jijanininine weebibine naace täapume, egä ai cina liba pa läbitipesi, weene piba pagege ätrunga. ³⁰Cane äblicäco gäne cerämu weene cama mene iicema, ingle ai gawecewe ne lui te ecaninige, tabe te tädenige. Tabe nuuja kokre lica gyene cäme täapume, ³¹yepä ätrunga cäco biname cina miiji gemi umle äbita, egä cane singi gäne Babe täapume piyepu jaawenimune iyeta, tabe ngena täapume cebine ituge jaji.

Abujängineye! Biiri läsinago, naclege ama cita ca.”

Waina Uli piyepu Teeme Ciipe

15 ¹“Cane age säne toraca waina uli, piyepu căme Babe te calwacupi ire atwiame gyene. ²Tabe căme cabu ca yaacnapimuge iyeta ciipe bine, lui cina kuu căco gemi. Yepä lui ciipe cina kuu cama birige, tabe cängenarage yaamacetnäjimuge, jugi bine jääglubäjemuge naace täapume teepi cerämu kuu päpäname. ³Căme mene te uja weebibine jugi căco me ituge wawena. ⁴Inajinege căme cabu, piba cane cuta weeme cabu pagege lenaja. Ciipe te liba lica uli mage cabu birige lenaja, tabe äblicăco kuu päpäna. Pepu gemi weene cuta äblicăco kuu päpäna, weene liba căme cabu lica birige lenaja.

⁵Cane waina uli gäne, weene ciipe gemi. Laati te căme cabu yaanajuge, cane lui me cabu nanajuge, tabe bucurage kuu jääpänimuge. Căme căco je weene nuuja gwidape ne äblicăco wawena. ⁶Laati te căme cabu lica yaanajuge, teebine yaajarusi uli ciipe ne liiyepu, siige maaje me läbituge. Maaje ciipe bine yaatomli-cmusi, uliobo cabu me yisabimusi, siige teepi puma layinusi. ⁷Weene liba căme cabu inajininuge piyepu căme mene te liba weeme cabu pisi nyene, piba weene jääpänimuye iyeta, weene lui täapume cebine nätinäruye. ⁸Weene liba bucurage kuu bine jääpänimuye, peei cabu ca căme Babe me jamyacu apacıyera te babo läbituge, siige weene lawabudnitininuye, egä weene căme abiberäja bägrä gemi. ⁹Căme Babe te lipu singi gyene căme täapume, cane cuta pipu singi gäne weeme täapume. Weene căme singi cabu inajipi. ¹⁰Weene liba căme mene bine yäacwetnimuye, căme singi te weeme cabu yaanajuge, epu pana cane lipu căme Babe me mene bine yäacwetnimune, siige teeme singi te căme cabu yaanajuge.

¹¹Cane ai mene naace täapume jįjananinine egä căme gege te weeme cabu lenajame, cuta weeme gege te babo äbitame. ¹²Cane weebibine jįjenininine, egä weene weemämu singi äbitanipeye, cane lipu weeme täapume singi ituge. ¹³Eei gyene baborage singi, biname te liba teeme ireclota ne yäayemaluge budre me teeme binamewale bime täapume. ¹⁴Weene liba căme mene ibi jaawenimuye, weene căme binamewale gemi. ¹⁵Cane ingwe ca lica iyinininine weebibine kaakesea bägrä ca, ingle kaakesea bägrä te umle căco teeme babo biname te ngena jęwenenige. Yepä cane iyinininine căme binamewale ca, ingle cane ituge weebibine jajanena iyeta, cane căme Babe bau ca ngena ituge ätecijana. ¹⁶Weene te cebine lica itu noomlepeye, yepä cane te weebibine itu joomlipene. Cane weebibine joomlipene, jįjipene otnime bucurage kuu bine päpäname, pepu kuu lui cina iyeteta gemi. Piba Babe te page icäripi iyeta gwidape, weene lui täapume yäätinäruye căme ngii cabu. ¹⁷Ai lui căme singi gyene, egä weene miiji weemämu singi äbitanipeye.”

Ätrunga cäco Biname cina Jäägyemusi Yeesu me Binamewale bine

¹⁸“Liba ätrunga cäco biname cina weebibine jimugitninsi, weene gone ngene jitrimalinuge, egä teepi cebine niinäce pepu ituge ämugetna. ¹⁹Weene liga ai gawecewe biname cama yepä cirege, teepi piba singi cirege weeme täapume, teepi lipu singi teeme täapume. Yepä weene teta cama yepä lica gemi, ingle cane te ituge weebibine teeme cabu ca oomlana, peei name pi teepi weebibine jimugitninsi.

²⁰Weene ngene gone jitrimalinuge, cane lipu jijininine egä, ‘Kaakesea bägrä te baborage lica gyene teeme babo biname bau ca.’ Peei name pi cebine liba ituge sabe wawena, cuta weebibine piba pagege sabe wawena. Biname cina liba cäme mene ituge ätecija, teepi cuta weeme mene piba pepu pagege ätecija. ²¹Yepä teepi weebibine iyeta ai pa jiwenanipesi cämiji pi, ingle teepi umle lica gemi tabe, cebine lui te nätyepuji.

²²Cane liga lica cire tädejine teebibine mene jajanename, piba teepi umle lica cirege, egä teepi niiya mule biname gemi. Yepä page teepi äblicäco iicana, egä teepi niiya mule biname lica gemi. ²³Laati te cebine nämugitnuge, tabe cuta cäme Babe ne jäämugetnuge. ²⁴Cane liga biname bime sobe cabu epu mule lica cire jaawenemejine, lui bine nuuja te lica ituge waweneca, teepi piba umle lica cirege, egä teepi niiya mule biname gemi. Yepä teepi ituge päpäna, cane ngena ituge wawenena, siige teepi nimugetnusi cibibine Babe cama. ²⁵Apu ibibi äbitenige teeme Cotre mene te egä, “Teepi papa taatu cewe je cebine nämugetnusi.”

²⁶Cane pa täätyepepene weeme bau me Aceji Seemo ne weebibine ätityeräjame piyepu aboclomtame, ngena gyene toraca. Tabe Babe bau ca pa tädepi, siige cebine pa naitnäjepi. ²⁷Weene cuta pagege cebine aitneja, ingle weene cane cama ituge lenaja cäme kaakesea agedna cabu ca.”

16 ¹“Cane naace täapume ai mene jijanininine egä weene ätrunga ne lica apesera. ²Israela biname cina weebibine teeme irecu ätumuta cabu ca pagege äyecreja. Cuta padare te page tädepi, liba lui cina weebibine budre me pa iglecipesi, teepi apu pa jaangemepi egä, ‘Cine miiji mule ne jewenisi Acejiyame täapume.’ ³Teepi naace name pi apu pagege wawena, ingle teepi umle lica ituge Babe piyepu cane. ⁴Yepä cane ai mene naace täapume jijanininine egä weene cäme mene ngene apename, ai cina liba pagege äbita.”

Aceji Seemo me Kaakesea

“Cane niinäce ai poto cidid me lica jijipene weebibine, ingle cane weene cama ge. ⁵Siige page cane teeme bau me ädenine, lui te cebine itu nätyepuji; yepä weeme nuuja te lica nätemlenige egä, ‘Maane liiyeme ädenite?’ ⁶Siige page cane lipu jijanininine weebibine, pui name pi weene ngenecu mäpu gemi. ⁷Cane toraca mene jijenininine weebibine,

egä ai lui miiji gyene cane weeme bau ca äyebtingtame, ingle cane liba lica äyebtingtenine, piba Aceji Seemo te lica pagege weeme bau me otni weebibine ätityerame. Yepä cane liba äyebtingtenine, cane pa täätyepene teebine weeme bau me. ⁸Siige Ätityerayame te liba pa tädepi, tabe te pagege awabudnäja ai gawecewe biname bime tääpume niiya mule piyepu ngena gyene conocäco piyepu Acejiyame te lipu biname bine atrana. ⁹Teepi cängena umle lica gemi, niiya mule ngena gyene, ingle teepi cebine lica nätrungenisi. ¹⁰Teepi cängena umle lica gemi, ngena gyene conocäco, ingle cane ädenine Babe bau me, siige weene cebine ingwe ca lica pa näpänepeye. ¹¹Piyepu teepi atrana poto cidi me cängena umle lica gemi, ingle ai gawecewe ne lui te ecanenige, teebine uja ituge atrana.

¹²Cäme bucurage mene piti nemi weebibine jajanename, yepä page weene ibibi lica gemi umle äbitame. ¹³Yepä Aceji Seemo, lui toraca gyene, liba pagege otni, tabe te pa sibiberäjiipi iyeta ngena gyene toraca. Tabe teemerage ngii cabu lica pagege iicema, yepä tabe eei mene pa jiiicemepi, tabe ngena ituge ätecija. Tabe ciige gwidape poto cidi me pa jijananipi. ¹⁴Tabe te weeme tääpume pagege awaba, egä cane lipu jamyacu apaalyera cama gäne, ingle tabe cäme bau ca ngena mene pa yäätəcijanepi, pui mene pa jijananipi weebibine. ¹⁵Iyeta lui cina cäme Babe memi, teepi cuta cämi nemi. Peei name pi cane apu jiiicine, egä Aceji Seemo te pa yaacatepi, cane teebine ngena pagege ceera, siige piba weebibine pa jijananipi.”

Mäpu Nгене Atwana te Pa Lateplingtepi Gege Me

¹⁶“Matikäli padare ingwe gaabe ca weene cebine lica page näpänepeye. Cuta puma cita ca matikäli padare ingwe gaabe ca weene cuta cääri cebine page näpänepeye.” ¹⁷Poto abiberäja bägrä cina teemeteme ätemläjinisi egä, “Tabe baa ngena tääpume nijinige egä, ‘Matikolä padare ingwe gaabe ca weene lica page näpänepeye cebine. Cuta puma cita ca matikolä padare ingwe gaabe ca weene cääri cuta page näpänepeye cebine.’ Tabe cuta jiiicige egä, ‘Apu gyene, ingle cane Babe bau me ädenine.’ ¹⁸Ngena gyene ingle teeme ai ‘matikäli padare ingwe gaabe ca’ mene tääpume. Mine umle lica gemi, tabe ngena tääpume jiiicenige.” ¹⁹Yeesu umle äbitige, egä teepi singi peei poto cidi me ätemlame, siige tabe jejemige egä, “Weene nää pui poto cidi me ngene jotwanininiye, cane lipu jijininine egä, ‘Matikäli padare ingwe gaabe ca weene lica cebine pa näpänepeye. Cuta puma cita ca matikäli padare ingwe gaabe ca weene cuta cääri cebine pa näpänepeye.’ ²⁰Cane toraca jijenininine, egä weene ele pingeni-tnipi, yepä ätrunga cäco biname cina gege pagege. Weene ngenecu mäpu cama pinajipi, yepä weeme peei ngenecu mäpu te gege me pa lateplingtepi. ²¹Magebi te liba bägrä

ärngime läbituge, tabe ngenecu mäpu birige, ingle pui padare cabu baborage pita ne jaasicnantuge. Yepä liba bägrä ne jäärnguge, tabe pita ngene jwäätrimaluge, ingle tabe gege birige, bägrä te lipu laplimluge ai gawecewe cabu me. ²²Cuta pepu gyene weeme täapume, weene page ngenecu mäpu cama gemi, yepä cane weebibine cääri pa jipänipene. Piba weene gege taatu pinajipi, siige nuuja te äblicäco gyene weebibine pui gege uutecra.

²³Pui padare cabu weene cebine lica pagege ätemla nuuja gwidape pototo cidi me. Cane toraca jijenininine, egä weene liba ngena täapume yäätinäruye Babe ne cäme ngii cabu, tabe icärininuge. ²⁴Weene Babe ne lica ituge ätinera nuuja gwidape täapume cäme ngii cabu ngälu page. Itinärepeye, siige weene pa jepänepeye piba weeme gege te babo pa läbitepi.”

Yeesu Gawecewe Mule bine Epremalemige

²⁵“Cane ngene ca agli mene ca bii jijanininine weebibine ai mule pototo cidi me. Yepä padare te pa tädepi, cane liba ngene ca agli mene ca lica pagege jajanena weebibine yepä cane pajecurage page jijanipene cäme Babe pototo cidi me. ²⁶Pui padare cabu weene weemämu irecu pa pätumutanipeye Babe bau me cäme ngii cabu; siige cane lica jijenininine, egä cane pagege weeme täapume irecu ätumuta Babe bau me, ²⁷ingle Babe te teemämu singi gyene weeme täapume. Tabe naace popi singi gyene weeme täapume, ingle weene singi ituge cäme täapume piyepu weene ituge ätru-nga, egä cane Acejiyame bau ca tädujine. ²⁸Cane Babe bau ca tädujine ai gawecewe cabu me, siige page cane ai gawecewe ne sebmalenine, acnenutenine Babe bau me.”

²⁹Puma cita ca abiberäja bägrä cina Yeesu ne jejisi egä, “Maane siige page pajecurage jiičenemite, lica ngene ca agli mene ca. ³⁰Page cine siige umle bäbitinago, egä maane umle gäte iyeta gwidape. Maane niinäce umle läbitute biname cina singi ngena täapume ätemlame. Peei name pi cine siige jitrungenisi, egä maane Acejiyame bau ca itu tädujite.” ³¹Yeesu jejemige teebibine egä, “Weene siige page jitrungeniye. ³²Padare te tädenige – siige uja bii tatyaramtige – weene liba eplidnäreniye weeme yepäyepä bime mete me, cebine taatu nabmaleniye. Yepä cane taatu lica gäne, cäme Babe pisi nyene cane cama. ³³Cane naace name pi weebibine iyeta ai mene bii jijanininine egä weene cäme cabu ca poode ne päpäname. Ai gawecewe cabu weene mäpu bine jääpänanemuye, yepä wälu gone äbita, cane gawecewe mule bine ituge apremela.”

Yeesu Iredu Ätumutenige Abiberäja Bägrä bime täapume

17 ¹Yeesu liba mene iicema iyeta apirige, tabe ire acitige cabucewe me, jiiçige egä, “Babe, cäme padare te biiri tatyaramtige. Maane

biname bime bau me eboclomtepi, egä cane mäame Bägrä lipu jamyacu apaclyera cama gäne piba cane biname bime cabu me pagege aboclomta, egä maane lipu jamyacu apaclyera cama gäte. ²Maane cebine conocäco itu näcärepete iyeta biname bine waadename naace täापume cane iyeteta ireclota ceerame iyeta eei biname bine, maane lui ituge ceera cebine.

³Lui cina umle gemi maane, lui säte yepä taatu toraca Acejiyame piyepu cuta lui cina umle gemi cane, Yeesu Keriso, maane lui ne ai gawecewe cabu me nätyepujite, teepi uja iyeteta ireclota cabu me bebäcnisi.

⁴Babe, cane mäame jamyacu apaclyera ne ituge aboclomta ai gawecewe cabu, ingle cane siige bepirine, maane lui kaakesea itu näcärepete cane te wawenama. ⁵Babe, mäame opo gaabe je maane pui yepä jamyacu apaclyera näcärepä, cäme lui apaclyera puga ge, cane liba maane cama jage agedname niinäce gaabe me.

⁶Cane ai biname bine umle ituge wawena mäame poto cidi me, maane lui ituge äjäcra cäme täापume ai gawecewe cabu ca. Teepi lui mäame biname ge, yepä cebine itu näcärepete maane. Teepi mäame mene ituge ätrunga, ⁷siige page teepi umle gemi, egä iyeta maane lui ituge ceera cebine, mäame bau ca gemi. ⁸Maane lui mene itu näcärepete cebine, cane teebibine ituge jajanena, siige teepi becatisi. Teepi umle gemi, egä toraca gyene, egä cane mäame bau ca itu tädujine. Teepi jitrungenisi, egä maane te cebine itu nätyepujite.

⁹Cane irecu ätumutenine teeme täापume. Cane lica irecu ätumutenine biname bime täापume, lui cina icrajenige gawecewe mule cabu, yepä cane ai bime täापume irecu ätumutenine, maane lui ituge cebine ceera, ingle teepi mäami nemi. ¹⁰Iyeta lui cina cämi nemi, cuta mäami nemi; piyepu lui cina mäami nemi, cuta cämi nemi. Biname cina teeme cabu ca jääpänuusi, egä cane lipu jamyacu apaclyera cama gäne. ¹¹Babe, cane siige page mäame bau me ädenine. Cane ai gawecewe cabu lica pa nanajepi, yepä teepi ama pagege. Mijirage Babe, maane miiji mäame ngii me kokre ca ire atwemame teebibine, lui ngii maane ituge cebine ceera, piba teepi yepä äbitame, mine liyepu yepä gegi. ¹²Cane liba taatu aga ge teta cama, cane teebibine cängena ire jaatwemune mäame ngii me kokre ca, maane lui ngii cebine ituge ceera. Cane ituge cängenarage teebibine ire atwema, siige nuuja te lica ituge apesera, yepä pui taatu gyene, lui te miiji otni niiya puupu cabu me naace täापume Oogäräneji mene te toraca me äbitame.

¹³Babe, cane page ädenine mäame bau me. Cane ai mene naace täापume jicenenemine, cane liba taatu ai gawecewe cabu je, egä cäme gege te teeme cabu babo äbitame. ¹⁴Cane mäame mene ituge jajanena teebibine, siige ai gawecewe muleyame biname cina teebibine jäämugetnemusi, ingle teepi gawecewe me lica gemi epu pana, cane lipu ai gawecewe me lica gäne. ¹⁵Cane lica naawejanenine maane teebibine

äsecreraime ai gawecewe cabu ca, yepä cane naawejanenine maane teebibine awecetnäráme Satani te oomlana wälu pi. ¹⁶Teepi ai gawecewe me lica gemi cane liiyepu. ¹⁷Määme mene ca lui toraca gyene, maane teebibine mara me jewenemepi määme täápume. ¹⁸Maane cebine lipu itu nätyepujite ai gawecewe cabu me, cane cuta piyepu teebibine ituge ätyepa ai gawecewe cabu me. ¹⁹Cane temiji pi căme ireclota ecitenine määme ime cabu naace täápume teepi cuta toracarage mara me äbitame määme täápume.”

Yeesu Irecu Ätumutenige Iyeta Ätrunga Biname bime täápume

²⁰“Cane ai abiberäja bägrä bime täápume taatu irecu lica ätumutenine, yepä cane cuta irecu ätumutenine eei bime täápume, lui cina cebine pa nätrungepesi teeme aitneja name pi. ²¹Cane irecu ätumutenine naace täápume teepi yepä me äbitame epu pana maane Babe te lipu căme cabu, cuta cane liiyepu määme cabu. Cane irecu ätumutenine, egä teepi cuta mine cama yepä me äbitame naace täápume ai gawecewe muleyame biname cina piba ätrungame, egä maane te nätyepujite cebine.

²²Cane teebibine yepä jamyacu apaclyera ituge ceera, maane lui näcärujite cebine, naace täápume teepi yepä me äbitame mine lipu yepä gegi. ²³Cane teeme cabu pisi näne, maane căme cabu pisi näte teepi piba toraca yepä äbitame. Siige piba ai gawecewe muleyame biname cina umle äbitininisi, egä maane te itu nätyepujite cebine piyepu maane te singi ituge teeme täápume, maane lipu singi ituge căme täápume.

²⁴Babe, maane cebine ai abiberäja bägrä itu näcärepete, siige cane singi gäne teepi cane cama lenajame, cane luma pagege lenaja, cuta cane singi gäne teepi päpäname jamyacu apaclyera ne, maane lui cebine ituge ceera, inge maane niinäce singi ituge căme täápume, ingwe ca ai gawecewe ne jewenujite. ²⁵Conocăco Babe, ai gawecewe muleyame biname cina umle lica gemi maane, yepä cane umle gäne maane piyepu ai cina umle gemi, egä maane te cebine itu nätyepujite. ²⁶Cane meebine ituge awabudnita teeme bau me, cuta cerămu naawabudnăjinine naace name pi, egä määme lui singi pisi nyene căme täápume teeme cabu cuta lenajame cuta cane teeme cabu lenajame.”

Yeesu ne Joomlisi

(Matayo 26:47-56; Mareko 14:43-50; Luuka 22:47-53)

18 ¹Ai irecu ätumuta mene ingwe gaabe ca Yeesu piba ädige teeme abiberäja bägrä cama, siige teepi Kidrona calame ne yuurisi. Calame nuuja poto doro ca puga ge calwacupi cewe. Yeesu abiberäja bägrä cama piyeme ädige. ²Teeme budre me awaba biname Yuuda, tabe cuta umle ge pui cewe, inge Yeesu teeme abiberäja bägrä cama bucurage gäabu labasecretnininusi puma. ³Puma cita ca Yuuda tädige

pui calwacupi cabu me. Modamoda iiwäreja biname piyepu Parisea sigu biname cina teta cama jityepimisi yepä sange cubu biname bine piyepu poto iiwäreja mete awamuta biname bine. Teepi lampa piyepu ngale bine ewadimisi. Teeme cuta cubu gwidape puga ge.

⁴Yeesu umle ge ngena te äbitenige teeme täápume, peei name pi tabe niinäce gaabe me awetäntige, jejemige egä, “Weene laati ne jirngeniye?”
⁵Teepi jejisi egä, “Cine Yeesu Nasareta cewe biname ne jirngeniisi.” Yeesu jejemige egä, “Cane age säne.”

Pui biname bime sobe cabu cuta Yuuda puga ge, Yeesu ne budre täápume awabayame biname te. ⁶Yeesu liba apu jejemige egä, “Cane age säne,” teepi ingwe gaabe me äsininisi, siige itrametne-malemige gawe cabu me. ⁷Yeesu cääri itemlimige egä, “Weene laati ne jirngeniye?” Teepi jejisi egä, “Cine Yeesu Nasareta cewe biname ne jirngeniisi.” ⁸Yeesu jejemige egä, “Cane nata uja bii jijinine, egä cane age säne. Yoo, weene liba cebine närngeniye, weene ire taatu jicranemeye ai cina otnime.”
⁹Apu toraca me bäbitige teeme niinäce gaabe mene te egä, “Cane nuuja ne lica ituge apesera, maane lui ituge cebine ceera.”

¹⁰Simona Peteru me cubu turikä puga ge, siige tabe sätige, jeläcnutige yepä biname me camu poto tablame ne iyeta. Tabe lui iiwäreja mope biname me kaakesea bägrä, ngii Malkus tage. ¹¹Yepä Yeesu Peteru ne jejige egä, “Isinglanti cubu turikä ne siiti bora me. Nää, maane apu naangeneniye, egä cane singi gäne uucraname ai mäpu cabu ca, cäme Babe te lui mäpu cebine ituge ceera?”

Yeesu ne Ecanisi Anas bau me Ätemleja täápume

¹²Cubu biname, teeme mope biname piyepu iiwäreja mete awamuta biname, teepi Yeesu ne joomlisi, seea ca jetäyisi, ¹³siige ecanisi Anas bau me. Anas lui sasa mope iiwäreja biname ge, Kayapa me gite ge. Kayapa tage pui kämäge cabu iiwäreja mope biname. ¹⁴Tabe peese nyene biname, lui te Israela biname bine jejemige egä, “Ai lui miiji gyene yepä biname te budre äbitame iyeta biname bime täápume.”

Peteru Yeesu ne Jeinige

(Matayo 26:69-70; Mareko 14:66-68; Luuka 22:55-57)

¹⁵Simona Peteru piyepu nuuja abiberäja bägrä, teepi Yeesu ne ingwe icwäsi. Iiwäreja mope biname te umle ge pui nuuja abiberäja bägrä, peei name pi tabe Yeesu cama abacitige iiwäreja mope biname me mete caale ngalebora me. ¹⁶Peteru caale kaake poto ca imyemutige. Puma cita ca pui nuuja abiberäja bägrä, iiwäreja mope biname te lui poto cidi me umle ge, tabe tacnenutige, grana ire atwi ngulebägrä ne jojige, siige Peteru ne sisinglantige caale ngalebora me. ¹⁷Puma cita ca pui grana ire atwi ngulebägrä te Peteru ne itemlige egä, “Nää, maane pui biname me abiberäja bägrä yepä gäte?” Peteru jojige egä, “Eewe, cane lica.”

¹⁸Pui lui gäbu padare ge. Kaakesea bägrä piiyepu iiwäreja mete awamuta biname cina uliobo yuungisi, siige gäbu jemajimige. Peteru cuta puga ge teeme sobe cabu gäbu jemajige.

Iiwäreja Mope Biname te Yeesu ne Itemläjige
(*Matayo 26:59-66; Mareko 14:55-64; Luuka 22:66-71*)

¹⁹Iiwäreja mope biname te Yeesu ne itemläjige teeme abiberäja bägrä poto cidi me piiyepu teeme abiberäja mene poto cidi me. ²⁰Yeesu teebine jejige egä, “Cane pajecurage biname bine jaajananemune piiyepu yaabiberäjimune abasecretna mete cabu ta piiyepu iiwäreja mete cabu, iyeta Israela biname cina liiyeme labasecretnaninusi. Cane nuuja mene ogä lica ituge iicana. ²¹Peei name pi maane ngeno me cebine nätemlite? Pui bine itemlimi, lui cina yäatecijanimume, cane ngena ituge jajanena. Teepi umle gemi, cane ngena ituge iicema.”

²²Yeesu ai mene liba jiiçige, yepä awamuta biname lui tage teeme gome, ime ca maapace gome yoororige, jejige egä, “Iiwäreja mope biname gyene tabe. Maane lipulipu mene jejite teebine!” ²³Yeesu jejige egä, “Cane liba niiyaniya jiiçine, nawabudniti, ngena gyene niiya. Yepä cane liba conocäco jiiçine, maane piba ngeno me cebine noororite?”

²⁴Piba Anas Yeesu ne ätäyäneji jityepige iiwäreja mope biname Kayapa bau me.

Peteru Cääri Yeesu ne Jeinige
(*Matayo 26:71-75; Mareko 14:69-72; Luuka 22:58-62*)

²⁵Simona Peteru camu aclajuteji ge puga uliobo gome, gäbu jemajige. Lui biname cina aclajuteji ge teta cama, jejisi egä, “Nää, maane age säte nuuja teeme abiberäja bägrä?” Yepä tabe jeinige, jejemige egä, “Eewe, cane lica.” ²⁶Iiwäreja mope biname me kaakesea biname bime yepä te, pui me inge biname Peteru lui me tablame jeläcnutige, tabe Peteru ne itemlige egä, “Cije cane meebine lica nääpänine teta cama calwacupi je?” ²⁷Peteru cääri jeinige, siige piba taatu paulo te ala sengenige.

Pilato Yeesu ne Itemläjige
(*Matayo 27:1-2; Mareko 15:1-5; Luuka 23:1-5*)

²⁸Yeesu ne iiwäreja mope biname Kayapa me mete cabu ca isatisi, Rooma gabmani babo biname ngii Pilato bau me ecanisi. Pui lui krokerage ge. Israela biname cina lica ebäcnisi Pilato me mete cabu me, inge teeme täapume cude gyene äsuplengta deedei loolo, teepi liba yäabäcnusi biname me mete cabu me, lui Israela biname lica ge. ²⁹Siige Pilato asatige mete cabu ca teeme bau me, itemlimige egä, “Weene ai biname ne ngeno me secaniye cäme bau me? Tabe ngena niiya ne ituge wawena?” ³⁰Teepi jejisi egä, “Tabe liga conocäco cirege, cine piba mäame

bau me lica cire saacanejisi.” ³¹Pilato jejemige egä, “Yoo siige, weene ecaneye, weemämu eblawäjepeye weeme cotre ibi.” Israela biname cina Pilato ne jejisi egä, “Cime conocäco lica gyene biname ne budre me acitame.” ³²Ai te naace täápume äbitige Yeesu me niinäce gaabe mene teeme budre gaabe poto cidi me toraca me äbitame.

³³Piba Pilato acnenutige teeme mete cabu me, Yeesu ne ala tesoglicige teeme bau me otnime, siige itemlige egä, “Nää, maane Israela biname bime mope biname gäte?” ³⁴Yeesu jejige egä, “Maane nää mäame ngene atwanena mene jicite, coo nuuja cina bii naajisi meebine?” ³⁵Pilato jejige egä, “Ebägä cane Israela biname gäne. Peei lui weemerage biname piyepu teeme modamoda iiwäreja biname, lui cina naacanisi meebine cäme bau me. Maane ngena niya ne itu tewenumete?” ³⁶Yeesu jejige Pilato ne egä, “Cane ai gawecewe mope biname bime pana lica gäne. Cane liga teeme pana cirege, cäme kaakesea bägrä cina cire larnginejisi, cebine lica cire nabmalejisi Israela biname bime ime cabu. Yepä cane ai gawecewe mope biname bime pana lica gäne.” ³⁷Piba Pilato Yeesu ne itemlige egä, “Nää siige toraca gyene, egä maane mope biname gäte?” Yeesu jejige egä, “Maane nata peega bii najite egä, ‘Maane mope biname gäte’. Cane aplimlujine piyepu ai gawecewe cabu me naace täápume tädujine biname bine jajanename, egä ngena gyene toraca. Laatibi toraca mene ibi yaacrajuge, teepi nätecijusi cebine.”

³⁸Pilato Yeesu ne jejige egä, “Ngena gyene toraca?”

Pilato Yeesu ne Budre me Jitranige

(*Matayo 27:15-31; Mareko 15:6-20; Luuka 23:13-25*)

Puma cita ca Pilato asatige mete cabu ca biname bime bau me, jejemige egä, “Cane nuuja inge ne lica jepänine teebine budre me atraname. ³⁹Yepä ai lui mule gyene egä cane äsuplengta soriyomu padare cabu yepä biname ne asatame krokeciye mete cabu ca weeme täápume. Weene nää singi gemi cane Israela biname bime mope biname ne asatame?” ⁴⁰Biname cina ala abayaninisi egä, “Eewe, tabe lica! Cine singi maane Baraba ne asatame!” Baraba lui cubucubu biname ge.

19 ¹Piba Pilato jejemige Yeesu ne acaname adnana täápume. ²Cubu biname cina pägepäge seeasea ne jemlemaltisi, teeme mope cabu ecitisi krauni täápume piyepu ciryäciryä cäbletääpe ca esigreräjisi. Teepi ai ne ätutena pana jebenisi, egä tabe babo mope biname gyene. ³Piba teepi seclige teeme bau me, jewablisi egä, “Sebore Israela biname bime mope biname,” siige ime ca yoororisi.

⁴Puma cita ca Pilato cuta cääri asatige teeme mete cabu ca, biname bine puutucu je jejemige egä, “Weene ire! Cane teebine sisatenine weene päpäname, egä cane nuuja inge ne lica jepänenine teebine atraname budre täápume.” ⁵Puma cita ca Yeesu tasatige. Pägepäge seeasea puga ge

teeme mope cabu piiyepu pui ciriyäciriyä cäbletääpe cama ge tabe. Pilato jejemige egä, “Jepäneye, age sena biname!”

⁶Liba modamoda iiwäreja biname piiyepu iiwäreja mete awamuta biname cina teebine jepänisi, teepi ala abayaninisi egä, “Baarge uli cabu jibyecreye! Baarge uli cabu jibyecreye!” Pilato teebibine jejemige egä, “Weene weemämu ecaneye teebine, baarge uli cabu jibyecreye. Cane nuuja ingle ne lica jepänenine teebine budre me acitame.” ⁷Israela biname cina Pilato ne jejisi egä, “Cime cotre te jiicenige, egä tabe miiji budre äbita, ingle tabe itu tainanumi Acejiyame me Bägrä ca.”

⁸Pilato liba itecijige ai mene, tabe baborage wälu äbitige, ⁹abacitige mete bora me. Tabe puga Yeesu ne itemlige, “Maane luma cita ca gäte?” Yepä Yeesu bojäcu ge, nuuja mene lica jiicige. ¹⁰Pilato jejige egä, “Nää, maane singi lica gäte cäme mene awecnistame? Cije maane umle lica gäte, egä cäme conocäco pisi nyene meebine asatame coo baarge uli cabu acitame?” ¹¹Yeesu jejige egä, “Määme conocäco ebä lica cirege, Acejiyame te liba lica cire nääcäreji meebine, peei name pi laati te cebine nacitige määme ime cabu, teeme niiya lui baborage gyene.”

¹²Pilato liba ai mene itecijige, tabe naabe liga äbitanige Yeesu ne asatame, yepä Israela biname cina ala abayaninisi egä, “Maane liba teebine sisatenite, maane Rooma gawe babo mope biname Siisa me biname lica gäte. Lui biname te lainuge mope biname ca, tabe Siisa ne yäacisärmutuge.”

¹³Pilato liba itecijige biname cina apu ala abayena je, tabe puma cita ca Yeesu ne sisatige, ädige, adnatige emä, biname bine luma jaatranimusii. Pui puupu lui kula ca acwabäneji ge, peei name pi einenisi ‘Kula Puupu’ ca. Heberu mene ca lui egä ‘Gabata’.

¹⁴Ai mule te äpletnutige bimu duusa poto cidi me, äsuplengta trii bimu me niinäce gaabe ca lui bimu ge. Pilato Israela biname bine jejemige egä, “Peese nyene weeme mope biname.” ¹⁵Teepi ala abayaninisi Pilato bau me egä, “Budre me egli, budre me egli! Baarge uli cabu jibyecreye!” Pilato teebibine itemlimige egä, “Cije weene singi gemi cane weeme mope biname ne baarge uli cabu me äbyecrame?” Modamoda iiwäreja biname cina jejisi egä, “Cime nuuja mope biname lica gyene, yepä Siisa sine!”

¹⁶Puma cita ca Pilato Yeesu ne ecitige teeme ime cabu teepi teebine baarge uli cabu acitame.

Yeesu ne Baarge Uli cabu Jibyecrisi

(Matayo 27:32-44; Mareko 15:21-32; Luuka 23:26-43)

Puma cita ca teepi Yeesu ne ecanisi. ¹⁷Tabe teeme baarge uli ne teemämu ecanige. Teepi atyarige cewe me lui ne einenisi ‘Mopekaake Cewe’ ca, Heberu mene ca lui ‘Gologota’. ¹⁸Teepi puga teebine toto ca jibyecrisi

baarge uli cabu. Neeneni biname bine cuta puga jääbyecrisi teeme gome, yepä lui nuuja poto ca cuta yepä lui nuuja poto ca, siige Yeesu teeme cole je. ¹⁹Pilato jejemige oogärame egä, YEESSU NASARETA CEWEYAME, ISRAELA BINAME BIME MOPE BINAME, siige pui mene äbyecrame baarge uli cabu Yeesu me mope gome. ²⁰Bucurage Israela biname cina ecnemisi pui mene bine, ingle lui puupu cabu jibyecrisi, cudecewe lica ge babo cewe gome ca. Pui mene lui oogäräneji ge Heberu mene ca, Latin mene ca, Griik mene ca. ²¹Modamoda iiwäreja biname cina jejisi Pilato ne, “Maane ngeno me yoogärite egä, ‘Israela biname bime mope biname.’ Maane cire yoogärejite egä ‘Ai biname te teemämu lainuge Israela biname bime mope biname ca.’” ²²Pilato jejemige egä, “Cane ngena bii byoogärine, pepu yaanajepi!”

²³Cubu biname cina liba Yeesu ne baarge uli cabu toto ca jibyecrisi, peei ingwe gaabe ca teepi teeme cäbletääpe bine jewadimisi, jebelanemisi, foomi bine jewenimisi, ingle teepi foomi biname ge. Puga ge nuuja cäbletääpe, lui mucmucu ge, äswäräneji deedi lica ge, Yeesu lui asigräneji yaacananuge ngalebora ca. ²⁴Teepi jicisi egä, “Mine ai ne gone yäädéricusi, yepä mine ngii cama bine yiisabäjenenemisi päpäname, egä laati te ecatenige.” Apu ibibi äbitige Oogäräneji mene te egä, “Teepi cäme cäbletääpe bine jebelanemisi, piyepu bääclena äbäclaninisi cäme yepä cäbletääpe täapume.” Yoo, cubu biname cina pepu jewenisi.

²⁵Yeesu me baarge uli gome jeclajutemige teeme mage, piyepu teeme mage me maade, cuta Kloopa me coga Mariya piyepu Mariya Magadala ceweyame magebi. ²⁶Yeesu liba jopänige teeme mage ne ämyemuteji teeme baarge uli gawe me pui abiberäja bägrä cama, tabe lui täapume babo singi, siige tabe teeme mage ne piba jojige egä, “Yääye, ire määme bägrä peese nyene määme gome!” ²⁷Piba tabe pui abiberäja bägrä ne jejige, “Ire, määme mage peeto nwene!” Peema cita ca pui abiberäja bägrä te ocanige Yeesu me mage ne teeme mete me lenajame.

Yeesu me Budre

(Matayo 27:45-56; Mareko 15:33-41; Luuka 23:44-49)

²⁸Yeesu umle ge, egä teeme kaakesea ne bepirige. Naace täapume Oogäräneji mene te toraca me äbitame tabe jicige egä, “Cane niye mäne.” ²⁹Caapocapo waina niye puga ge. Puma cita ca yepä biname te waarpopale pana gwidape ne yiiglenutige pui waina niye cabu me, cusopi suru ca jigadige, ewepäntige, Yeesu me tage cabu ecitige, ³⁰siige tabe enige. Piba ingwe ca tabe jicige egä, “Iyeta cäme kaakesea bine siige biiri bepirimine.” Piba teeme mope te ergo ecirige, siige tabe budre äbitige.

Yeesu ne Drawace Gome Jigadisi

³¹Pui lui Israela biname bime Sabade amacetnäja bimu ge, peei name pi teepi eclige Pilato ne jajime, egä lipu gyene baarge uli cabu lui nesae

biname bime pupuwace kaake bine acnapecame piyepu budrekaake bine ätrungame. Teepi singi lica Sabade bimu te puma wawenname budrekaake bine atacwäneji baarge uli cabu, ingle pui Sabade lui baborage bimu ge teeme täápume. ³²Puma cita ca cubu biname cina eclige, Yeesu cama lui neeneni biname bine jääbyecrisi, teepi teeme pupuwace kaake bine icnapimisi. ³³Teepi liba seclige Yeesu bau me, teepi teebine jepänisi budre, peei name pi teeme pupuwace kaake bine lica ääcnäputisi. ³⁴Piba teeme yepä te kalaku ca jigadige teebine drawace gome. Pui dupe cabu ca uudi piyepu niye cina tapiräsi. ³⁵Yoo lui te ai ne jepänuji, tabe jeitnäjenige naace täápume weene cuta piba ätrungame. Tabe ngena jeitnäjenige, toraca gyene. Tabe umle gyene, egä tabe toraca mene jiicenige. ³⁶Peei cina äbitininisi ai Oogäräneji mene te ibibi äbitame egä, “Teeme nuuja kaake ne lica pagege ägäbuta.” ³⁷Cuta nuuja gome jiicenige egä, “Teepi teebine ire jетwenisi, kalaku ca lui ne drawace gome jigadisi.”

Yeesu ne Gape cabu Ecitisi

(Matayo 27:57-61; Mareko 15:42-47; Luuka 23:50-56)

³⁸Ai ingwe gaabe ca yepä biname ngii Yoosepa, Arimatea cewe biname, te ädige Pilato bau me. Tabe cuta peese nyene yepä Yeesu me abiberäja bägrä. Yepä tabe cabucabu lica jitrungige, ingle tabe wälu ge Israela modamoda biname bime täápume. Tabe Pilato ne itinärige Yeesu me budrekaake ne ätrungentame. Pilato teebine ‘yoo’ mene jejige, siige Yoosepa ädige Yeesu me budrekaake ne ätrungentame. ³⁹Yepä biname ngii Nikodemo, tabe peese nyene Yeesu ne lui te ciye cabu yäädärepä, tabe cuta tädige piyeme. Tabe secanige teeti kilo miijirage lengolengo ngängye, lui wawenäneji ge miira uli ngedo ca piyepu aloe uli migi ca. ⁴⁰Teepi Yeesu ne itrungentäsi, cäbletääpe bine ipyacemäsi pui ngängye ca, siige tope etnäsi. Israela biname cina apu jaawenimusi teeme budrekaake bine gape cabu acraname. ⁴¹Pui puupu gome Yeesu ne luma baarge uli cabu ecitisi, calwacupi puga ge. Pui calwacupi cabu kula bora uureji ätruna cäco gape puga ge. ⁴²Ingle Sabade bimu me amacetnäja bimu ge, peei name pi teepi puma ecitisi, ingle pui gape lui teeme budre puupu mameta ge.

Yeesu Budre cabu ca Arpinantige

(Matayo 28:1-8; Mareko 16:1-8; Luuka 24:1-12)

20 ¹Sande krokerage baani te liba seclitige, Mariya Magadala cewe magebi te piba oclige gape ängräräme, siige jepänige, egä baborage kula te apeträngteji gyene gape grana gome ca. ²Puma cita ca tabe uuwamenamena oclige Simona Peteru piyepu pui nuuja abiberäja bägrä bau me, Yeesu lui täápume baborage singi, siige jaajige egä, “Teepi mime Yageyame ne becatisi gape cabu ca. Cine umle lica gemi, teebine luma bii becatisi?”

³Piba Peteru piyepu pui nuuja abiberäja bägrä aalige gape cabu me. ⁴Teepi niinäce yepä ibi uuwamäsi, yepä pui nuuja abiberäja bägrä te Peteru ne itucäridge, siige niinäce atyaramtige gape gome me. ⁵Tabe äcupige, apepmalige gape bora me, bulubulu cäbletääpe bine jepänimige, yepä tabe lica abacitige. ⁶Teeme ingwe ca Simona Peteru te tädige, siige gaabe ta abacitige gape bora me. Tabe jepänimige bulubulu cäbletääpe bine puma, Yeesu ne lui ca tope setnumesi, ⁷cuta cäbletääpe ne jepänige, teeme mope ne lui ca tope setnumesi. Pui cäbletääpe lui mara gome enajige, lica potu cäbletääpe luma. Pepu tope enajige, Yeesu me mope ne lipu setnumesi. ⁸Piba pui nuuja abiberäja bägrä, lui te niinäce atyaramtige, tabe cuta abacitige. Tabe liba jepänige iyeta, siige tabe piba jitrungige. ⁹Teepi camu umle cäco aanajige, Oogäräneji mene te lipu jicenige, egä tabe budre cabu ca cirege arpinenta. ¹⁰Puma cita ca abiberäja bägrä cina acnenutäsi mete me.

Yeesu Aboclomtige Mariya Magadala Ceweyame Magebi bau me
(*Matayo 28:9-10; Mareko 16:9-11*)

¹¹Mariya puga ge ele cama aclajuteji gape grana gome. Tabe liba ele cabu camu ge, tabe piba apepmalige gape cabu me, ¹²neeneni Acejiyame me mename seemo bine jääpänige adnatäneji ge pui puupu cabu, Yeesu ne luma secitumesi. Teepi bulubulu cäbletääpe asigräreji ge. Nuuja te lui mopingle jage, nuuja te lui ernge gome jage, siige teepi Mariya ne jojäsi egä, ¹³“Magebi, maane ngeno mäte ele?” Tabe jaajige egä, “Teepi cäme Yageyame ne becatisi. Cane umle lica gäne baa luma becatisi.”

¹⁴Ai mene ingwe gaabe ca tabe atatrongtige, jepänige Yeesu ne aclajuteji, yepä tabe teebine opo lica ewatnige. ¹⁵Yeesu utemlige egä, “Magebi, maane ngeno mäte ele? Laati ne jirngenite?” Mariya apu jongige, egä calwacupi ire atwi biname ge, peei name pi tabe jejige egä, “Babo biname, maane liga Yageyame ne becatite, cebine naji, maane luma bii becatite, cane piba oclenine acatame.” ¹⁶Yeesu jojige teebine egä, “Mariya!” Piba Mariya cääri atatrongtige, teebine jejige Heberu mene ca egä, “Raboni.” Peei lui egä ‘Abiberäja biname.’ ¹⁷Yeesu Mariya ne jojige egä, “Gone cebine noomlute, ingle cane camu gäne cäro Babe bau me otni. Maane äte ocli cäme abiberäja bägrä bime bau me, jejemepi, egä cane ädenine teeme bau me, lui sine cäme Babe piyepu teeme Babe, cäme Acejiyame piyepu teeme Acejiyame.” ¹⁸Piba Mariya Magadala cewe magebi te oclige, teeme abiberäja bägrä bine jejemige egä, “Cane Yageyame ne bii jepänine,” piyepu tabe jejemige Yeesu teebine ngena jojige.

Yeesu Aboclomtige Teeme Abiberäja Bägrä bime bau me
(*Matayo 28:16-20; Mareko 16:14-18; Luuka 24:36-49*)

¹⁹Pui Sande mämleteca me abiberäja bägrä cina abasecretnige yepä mete cabu me, siige gaabe armeji ge Israela modamoda biname bime

wälu name pi. Yeesu puma cita ca tädige, teeme cole je jeclajutige, jejemige egä, “Poode weene cama yaanajegel!” ²⁰Ai mene iicema ingwe gaabe ca tabe teeme ime aaboclomtige teeme bau me cuta drawace ne eboclomtige. Abiberäja bägrä cina babo gege ge, teepi lipu Yageyame ne jepänisi. ²¹Piba Yeesu cääri jejemige egä, “Poode weene cama yaanajegel! Cäme Babe te lipu cebine nätyepuji, cane pepu jityepininine weebibine.” ²²Puma cita ca tabe buuwemope ne jipwälutige teeme bau me, jejemige egä, “Aceji Seemo ne ecateye! ²³Weene liba biname ne jaajuye egä ‘Määme niiya mule äcisäjeji gemi,’ siige tabe kälyä läbituge. Yepä weene liba jaji cäco peei mene, tabe piba kälyä lica läbituge.”

Tooma me Ätrunga cäco Mule

²⁴Tooma, twelb abiberäja bägrä bime yepä, lui ne einenisi ‘Päädepäde’ ca, tabe poto abiberäja bägrä cama lica ge pui tomi cabu, Yeesu liba teeme bau me aboclomtige. ²⁵Teepi Tooma ne jejisi egä, “Cine Yageyame ne biiri jepänisi.” Tooma jejemige egä, “Cane ebä jitrungininine weebibine, cane liba toto dupe bine jääpänenine teeme ime cabu, piyepu ime kukluta aacitenine piyeme, cuta liba ime ecitenine teeme drawace cabu.”

²⁶Seben bimu ingwe gaabe ca abiberäja bägrä cina cääri abasecretnige yepä mete me. Tooma cuta puga ge. Gaabe armeji ge, yepä Yeesu abacitige, jeclajutige teeme cole je, jejemige egä, “Poode weene cama yaanajegel!” ²⁷Puma cita ca tabe Tooma ne jejige egä, “Maane ire cäme ime cabu me! Määme ime kukluta taaciti ama cäme ime dupe cabu, cuta drawace cabu määme ime seciti. Gone ätrunga cäco naanajuge, yepä maane miiji ätrunga!” ²⁸Tooma Yeesu ne jejige, “Cäme Yageyame, cäme Acejiyame!” ²⁹Yeesu teebine jejige egä, “Maane ätrunga gäte page, maane lipu näpänite cebine. Gege gemi eei biname, päpäna cäco je lui cina ätrunga.”

Ai Peba me Ingle Ngena Gyene

³⁰Yeesu bucurage poto ciitaca mule bine jwenimige teeme abiberäja bägrä bime irewale je, yepä teepi oogäräneji lica gemi ai peba cabu. ³¹Ai bine ituge oogäretnäja weene piba ätrungame, egä Yeesu lui Keriso sine, Acejiyame me Bägrä gyene, siige weene liba birige ätrunga, weene piba iyeteta ireclota ne jääpänuye.

Yeesu Aboclomtige Seben Abiberäja Bägrä bime bau me

21 ¹Ai ingwe gaabe ca Yeesu teeme abiberäja bägrä bime bau me cääri aboclomtige Tiberiya sawa gome. Peei mule lui apu gyene: ²Simona Peteru piyepu Tooma, lui ne ‘Päädepäde’ ca einenisi, piyepu Natanaela Kaana cewe biname Galilaya probins cabu ca piyepu Jebeday

me bägrä neeneni, cuta nuuja abiberäja bägrä neeneni, iyeta teepi puga ge. ³Simona Peteru poto bine jejemige egä, “Cane cibubade me lädene.” Teepi jejisi egä, “Cine cuta naclenige maane cama.” Piba teepi eclige, poo cabu me acetnärige, yepä pui ciye cabu teepi nuuja cibi ne lica joomlisi.

⁴Krokerage bimu te liba tajarige, Yeesu niye ligiligi jeclajutige, yepä abiberäja bägrä cina opo lica ewatnisi teebine. ⁵Piba tabe itemlimige egä, “Cäme binamewale, cibi bine weene lica bii joomlemiye?” Teepi jejisi egä, “Eewe, cime nuuja gwidape lica gyene.” ⁶Tabe jejemige egä, “Weeme net ne ijareye poo camu poto cidi ca, piba weene cibi bine joomlenenemiye,” siige teepi net ne pui poto cidi me ijarisi piiyeme. Mäpu name pi teepi äblicäco ge net ne aswecla poo cabu me acenutame, ingle bucurage cibi bine joomlemige.

⁷Puma cita ca pui abiberäja bägrä, Yeesu lui täapume babo singi ge, Peteru ne jejige egä, “Ai lui Yageyame sine.” Simona Peteru liba itecijige, egä Yageyame sine ai, tabe cäbletääpe ca amlemaltige, ingle tabe cäbletääpe bine iirecäneji ge, siige piba niye cabu me uuplige doro atwangame. ⁸Poto abiberäja bägrä cina poo ne sewäcisi doro me, net ne cuta selädnisi teeme cibi cama, ingle teepi cudecewe lica ge doro cabu ca, yepä hanred miita pana padare ge doro oomlaname. ⁹Teepi liba poo cabu ca ärpige, teepi jepänisi egä cibi muye wiiryere cabu puga ge piyepu buluduu cuta puga ge. ¹⁰Yeesu jejemige egä, “Sewademeye poto cibi, weene lui bine joomlemiye.”

¹¹Yoo, poo liba doro jage, Simona Peteru acenutige poo cabu me, net ne piba selädnige doro me bucurage modamoda cibi cama. Pui lui yepä hanred fiftitri cibi ge. Ngänuge puu bucurage cibi, yepä net te lica äderärige. ¹²Yeesu jejemige egä, “Naaclege deedei äbitame.” Abiberäja bägrä cina wälu ge ätemlame egä, “Maane laasi näte?” ingle teepi umle ge, egä ai lui Yageyame sine. ¹³Puma cita ca Yeesu ädige, buluduu sewadige, teebibine ecäranemige piyepu cibi ecäranemige. ¹⁴Ai lui Yeesu nesae me aboclomtige abiberäja bägrä bime bau me, tabe liba budre cabu ca arpinantige.

Yeesu piyepu Peteru

¹⁵Teepi liba deedei äbita siige, piba Yeesu Simona Peteru ne itemlige, “Simona Yoane me bägrä, mäame singi cäme täapume nää baborage gyene ai poto bime singi cabu ca?” Tabe jejige egä, “Yoo Yageyame! Maane umle gäte, egä cane singi gäne mäame täapume.” Yeesu teebine cuta jejige, “Maane cäme maamoi bine cängena engäremepi!” ¹⁶Puma cita ca tabe neeneni me itemlige egä, “Simona Yoane me bägrä, äi nää maane singi gäte cäme täapume?” Peteru jejige, “Yoo Yageyame! Maane umle gäte, egä cane singi gäne mäame täapume.” Yeesu jejige, “Maane cäme maamoi bine ire natwemepi.” ¹⁷Puma cita ca tabe nesae gäabu

me cuta itemlige egä, “Simona Yoane me bägrä, äi nää maane singi gäte cäme tääpume?” Peteru ngenecu mäpu me äbitige, ingle Yeesu lipu nesae gääbu teebine itemläjige yepä mene ca. Puma cita ca tabe Yeesu ne jejige egä, “Yageyame, maane umle gäte iyeta gwidape, cije maane umle gäte, egä cane singi gäne määme tääpume!” Yeesu jejige teebine, “Cäme maamoi bine engäremepi. ¹⁸Cane toraca naajenine, maane liba mamye biname ge, maane lamacetnäjute, siige lädute maane liiyeme singi otnime. Yepä maane liba moda je cirege, maane ime cire uutepi, siige nuuja te cire naamacetnäjepi otnime, cire naacanepi, maane liiyeme singi lica gäte otnime.”

¹⁹Ai iicema ca Yeesu eboclomtige Peteru lipulipu gaabe ca cirege budre päpäna Acejiyame me ngii ne awepentame. Piba Yeesu Peteru ne jejige egä, “Cebine ingwe näcwepi!”

Yeesu piyepu Nuuja Abiberäja Bägrä

²⁰Puma cita ca Peteru atatröngtige ingwe gaabe me, pui nuuja abiberäja bägrä ne jepänige, Yeesu lui tääpume babo singi ge. Tabe peese nyene, lui te Yeesu cabu me läbyenutepi, teepi liba deedei äbita cabu jage, yäätlemlepi egä, “Yageyame, laati te meebine naawabenige budre me?” ²¹Yoo siige, Peteru liba teebine jepänige, tabe Yeesu ne jejige egä, “Yageyame, ai biname tääpume ngena te cire läbitepi?” ²²Yeesu Peteru ne jejige egä, “Cane liba singi gäne tabe ama lenajame ngälu cane cire tacnenutepene, peei määme bau lica gyene. Maane cebine yepä ingwe näcwepi!”

²³Siige mene te iyeta otnetnäjige eei biname bime cabu me, Yeesu ne lui cina jitrungenisi, egä ai abiberäja bägrä te lica budre cire läbitepi. Yepä Yeesu lica jiicige, egä tabe budre lica cire läbitepi, yepä tabe jiicige egä, “Cane liba singi gäne tabe ama lenajame ngälu cane cire tacnenutepene, peei määme bau lica gyene.”

²⁴Tabe sine pui abiberäja bägrä, lui te jeitnäjemige iyeta ai mule bine, cuta tabe te yoogäremige iyeta ai mene bine. Mine umle gemi, egä tabe ngena jiicemige, toraca gyene.

²⁵Yeesu bucurage poto mule bine jebenimige. Iyeta peei bine liba oogära je yepäyepä, cane apu ngene jotwanenine, egä puupu ibi lica gyene ai gawecewe cabu iyeta peei peba bine acraname. Cäme mene ngälu peese nyene.